

حارة الوسواس

إبراهيم فؤاد

دار بيوند للنشر والتوزيع
٤ ش كمال حسين متفرع من ومبي الهرم
٠١٠٩٦٩٠٠٠٠٧

Beyond.dbh@gmail.com

جميع الآراء الواردة في هذا الكتاب تعبر عن رأي كاتبها. ولا تعبر بالضرورة عن رأي دار النشر

الكتاب: حارة الوسواس

المؤلف: إبراهيم فؤاد

الطبعة: الأولى

تصنيف الكتاب: رواية

تصميم الغلاف: محمد مجاهد

التدقيق اللغوي: أحمد محمد عبدالستار

الإخراج الداخلي: صبرينة غلمي

رقم الإيداع: ٢٠١٨ / ٢٢٣٩٨

التقييم الدولي: ٥-٣٢-٤٥٠٦٦٤٥-٩٧٧-٩٧٨

دار (بيوند) للنشر والتوزيع

المدير العام

رئيس مجلس الإدارة

صبرينة غلمي

محمد عز الدين

+٢ ٠١٠٩٥٦٠٠٠٠٧

bevond.dbh@gmail.com

أهداء الي

حبيبتي التي لم تخلق سوي لي، التي اسندتني حتي بدأت في
الافاقة مرة اخري، ساكون لكى ولم ابقى لسواكي. فكوني
معي حتي استطيع يا اسراء قلبي، والي أهلي الذين يقفون
معي ولم يتركوني لحظة، والي اصدقاء الفيس بوك الذين
يحبونني من غير اسباب بالفعل انتم فخري، والي حلمي
البعيد الذي ينتظرنى اننى اتى لك فى القريب حتى نحقق
النضال سويًا يا حلمي، واخيرا الي كل شخص لم يستطيع
كتابة روايته الاولي لا تياس فأنك تقترب من النجاح بدون
أن تحس. شكرا

إبراهيم فؤاد

(مشهد من الماضي)

- ماما.. ماما اصحي!

صوت بكاء حسام بالغرفة وهو يوقظ أبويه من النوم، قالت الأم ويبدو عليها عدم الفهم:

- مالك يا حبيبي فيك إيه؟!!

- ماما أنا كنت نائم لوحدي في الأوضة حسيت بصوت جنب ودني..
ويخرج زفيراً ويكمل:

- بيكلمني بس مش عارف صوت مين.. أنا خايف أوي!

قال الأب قلقاً بعد حديث حسام وهو يزيل البطانية من عليه:

- تعالى يا حبيبي نام جنبنا وسطنا متخفش احنا معاك.

- يا بابا الصوت ديما ببيجي ليا وساعات يخليني أعمل حاجات أنا مش
عايز أعملها.

وأردف:

- أنا حاسس إن جوايا حد ثاني غيري.

رد الأب:

- يا حبيبي قولت لك متخفش احنا معاك انت لسة صغير عندك ١٢ سنة
يعني قلبك لازم يكون جامد.

استمع حسام لهذه الكلمات من أبيه وهو نائم بينهم ويحرق للسقف
ويحرك شفثيه ويقول بصوت مريب نسبيا:

- أنا لازم قلبي يجمد، مفيش صوت بيكلمني..

عيادة الدكتور شوقي أخصائي نفسي للأطفال، تقع عيادته في منطقة
بولاق الدكرور بالقرب من منزل حسام، اشتهر شوقي بأنه من أحسن
الأطباء الذين يعالجون الأمراض التي تأتي للأطفال بالطريق النفسي
بدون علاج دوائي. صغير في السن، في العقد الثلاثين من عمره، أبيض
الوجه، والنظارة لا تفارقه لأنه لا يستطيع أن يسير خطوة واحدة من
غيرها، قال بابتسامته المعتادة:

- حسام حبيبي عامل إيه؟ شوفت جيبت ليك الشكولاتة اللي انت بتحبتها.

اندفع عليه حسام قائلا:

- دكتور شوقي أنا بحبك أوي!

تكلم شوقي:

- ازيك يا أستاذ فايز وأخبارك إيه يا مدام؟

- الحمد لله يا دكتور كويسين، بس حسام محتاج يحكي ليك سر.

قال شوقي رافعا حاجبه:

- حصل إيه يا روعي يا صغنة انتي؟

- يا دكتور أنا الأصوات رجعت تكلمني ثاني وأنا بنام، وساعات لما أكون قاعد في الفصل لوحدي في المدرسة.

- طب مقدرتش تعرف نوع الكلام اللي بتسمعه إيه؟

- لا بس بحس إن في حاجة في دماغي تامرني أعمل حاجة مش عايز أعملها، مثلا كنت بذاكر وخلصت مذاكرة قعدت خمس دقائق لقيت صوت جامد جنبني متحكم في عقلي وقالي انت مذاكرتش ونسيت حاجات في الواجب قمت جريت فتحت الكشكول لقيتني منستش حاجة وخلصت الواجب.

قال شوقي بدهشة:

- عادي يا حبيبي كلنا بيحصل لينا كدا متقلّش.

جلس شوقي على مكتبه وجعل يحك بأصابعه على ذقنه ونظر إلى والدة حسام وقال:

- مدام ممكن تاخدي حسام وتخرجي براه؟ أنا محتاج أتكلم مع فايز شوية.

استدار برأسه لفايز بعد أن أصبحا بمفردهما داخل الغرفة بالعيادة ويقول:

- بص أنا مخبيش عليك انت جيت ليا في الأول عشان التبول اللاإرادي لابنك واتعالج منه، أما موضوع الأصوات أنا قولت ممكن يكون حاجة عندكم في البيت وكتبت ليه علاج انتباهي لتنشيط الانتباه في خلايا المخ والتركيز وخلص، وأنا أتأكدت إن الأصوات دي صادرة من نطاق عقله

الداخلي بعد ما العلاج خلص والأصوات زي ما هي والتحكم العقلي باقي، للأسف ابنك مريض بالوسواس القهري.

قال فايز متعجبا:

- وسواس إيه يا شوقي! انت مدرك باللي بتقوله؟ ابني لسة صغير على إن يجيله وسواس!

- للأسف حالة ابنك دي بتحصل ٢% فقط من سكان العالم، بيكون عندهم الوسواس القهري من صغرهم ومع مراحل عمرهم يبدأ يقلب معاهم بمرض نفسي والله أعلم باللي جاي.

نضح العرق على جبين فايز وفاتح فمه قائلا:

- يعني ابني مع التقدم في العمر بيقا مريض نفسي؟ مفيش علاج نلحقه بيه يا شوقي؟

أخرج شوقي زفيرا وأمسك بعلبة السجائر وأخرج سيجارة وقال:

- بص الوسواس القهري في حالة ابنك بالأخص عشان جاله من صغره ببدا يسيطر على بعض خلايا المخ ويتحكم فيه ويوجهه على عمل أفعال ممكن تؤدي للانتحار، احنا هنفضل معاه بالعلاج النفسي الدقيق لحد سن ٢٢ سنة ولو مجابش نتيجة بيقا مفيش أمل نبدأ المرحلة الثانية من العلاج وهي إننا نديله الأدوية الخاصة بمرض الاكتئاب الحاد.

أسند فايز رأسه على الحائط وقال:

- أنا كذا ابني الوحيد راح مني!

(عام ٢٠٢٠)

- في البداية أنا حابب أعرفكم بنفسي، أنا الدكتور شوقي عبد الحميد، استشاري أمراض النفسية الخاصة بالأطفال، بس مش أوي يعني والكبار كمان، أنا هدخل معاكم في الموضوع على طول، من ١٣ سنة كنت بعالج طفل من التبول اللاإرادي، المهم عالجت الطفل دا وخف، من بعدها جه أبوه وأمه اشتكولي من إنه بيعاني من سماع أصوات في رأسه كنوع من الوسوسة والتداخل العقلي الباطني والكل يعرف إن الوسوسة مرض متعلق بالإدراك العقلي، كتبت له على علاج لتزويد حركة الانتباه وبينني وبينكم أنا شكيت إن يكون ساكنه أعوذ بالله العفاريت بيتهم، بس للأسف في يوم جه ليا العيادة سمعت منهم كلام غريب، إن سماع الأصوات زاد في الليل والنهار كمان لدرجة تحكمية في عقل الطفل وبدأ يؤمره بتعليمات معينة ويشككه في أفعاله، وقتها قولت لأبوه إن ابنك مصاب بالوسواس القهري، أبوه اتصدم وقال ازاي مرض زي دا يصيبه وهو في عمر ١٢ عام بس، بس ميعرفش إن حالة ابنه دي بتصيب ٢% من سكان الأرض ويتحول عندهم الوسواس إلى مرض نفسي مزمن يؤدي إلى الموت الانتحاري مع الوقت إذا لم يتم معالجته، بدأنا معاه بالمعالجة النفسية حتى سن ٢٠ سنة جابت نتيجة للأسف وهمية، أو ممكن تقولوا مؤقتة، الوسواس تحكم فيه كلياً، عمل خلل في الاتصال بين الجزء الأمامي للمخ المسئول عن الإحساس بالخوف أو الخطر والعقد العصبية العميقة اللي بتتحكم في قدرة الإنسان على البدء في التفكير، بالتأكيد سببته مشاكل كثيرة، حاولنا معاه سنة ورا سنة لغاية ما وصلنا لحل إننا نديله أدوية الاكتئاب زي المعروف عشان تعمل على ارتفاع نسبة السيروتونين اللي بتكون منخفضة عند

بعض الأشخاص اللي بيعانوا من الوسواس القهري المزمن، مع الوقت والعلاج بدأ يرجع لطبيعته وخف ودا في حد ذاته إنجاز، بس أدوية الاكتئاب دي مش بتعالج كل شخص عنده وسواس، لا حسب تأثير العلاج على الشخص بالنتيجة، وظهرت بعض الآثار الجانبية اللي سيطرنا عليها كمان لحد ما قدر إنه يعيش بطبيعته.

في اجتماعي الشهر دا معاكم حبيت إنني أتكلم عن الشاب دا اللي موجود بيننا دلوقتي، هو "حسام فايز".

أدار الجميع رأسه حتى ينظر لذلك الشاب أثناء جلوسهم في قاعة المؤتمرات بنادي الأطباء، صعد حسام أعلى المسرح ووقف بجوار الدكتور شوقي، الشاب ذو الجسم الرفيع، الأسمر، يرتدي بذلة زرقاء والابتسامة على وجهه، وينظر للحاضرين الذين لم يتوقفوا لحظة عن التصفيق له حتى طلب شوقي منه أن يذهب ناحية الميكروفون ليتحدث لهم، أمسك بالميكروفون قائلاً:

- لو الوسواس قتل عقلي واتحكم فيه في يوم من الأيام فمش هيقدر يتحكم في قلبي وضميري.

ثم ذهب إلى أسفل المسرح وجلس على مقعده ووضع يديه على ركبتيه والحضور متعجبون من حديثه والدكتور شوقي الذي ظل واقفا يفكر: "هو إيه الجملة الغربية اللي قالها حسام! عقل وقلب وضمير! أنا عالجتة وييجي بدل ما يشكرني قدام الناس يقولهم الكلام العقيم ده!".

أنهى شوقي المؤتمر سريعا وطلب من الحضور الانصراف وأمسك بيد حسام ودفعها بقوة وانصرفا سويا إلى السيارة التي تتمركز في الخارج وركبوها وهدق شوقي بعينيه للأمام ويقول غاضبا:

- يعني أنا جايبك معايا عشان تقول الجملتين العبط دول؟؟

يأخذ أنفاسه التي تخرج كنار يلتهم القش:

- أنا قولتلك مش بحب أتكلم مع حد.. انت أجبرتني يا دكتور إني آجي عشان تتفاخر بإنجازك وإني اتعالجت.. مسألتش نفسك مرة فعلا أنا خفيت بجد ولا ممكن أكون بكذب عليك؟

- انت مجنون يابني ولا إيه! كل التحاليل والجلسات أثبتت إنك خفيت وإن نسبة السيروتونين مرتفعة، وانت نفسك الأصوات اختفت والتخيلات انتهت من عقلك، وانت بقيت بنتحكم في الوسوسة.

رد حسام ضاحكا بسخرية:

- فعلا بس نسيت حاجة يا دكتور، إن التشنجات الجلدية لسه بتيجيلي بعد أدوية الزفت الاكثاب اللي انت اديتهاالي ولا نسيت؟ يعني أنا مخفتش.

- أنا قولتلك ولأبوك إن التشنجات هتفضل عندك مش هتخف غير جلسات الكهرباء وانت مرضيتش!

قاطع حسام حديثه بغضب:

- بيقا متطلبش مني أطلع أمدح فيك وإنجازك الوهمي زي علاجك يا دكتور!

حل الصمت على وجهيهما، ينظر الاثنان أمامهما، حتى رفع شوقي يده ناحية حسام قائلا:

- بص يابني انت متتعبنيش معاك، أنا موافق إنني أبدأ معاك مرة ثانية
العلاج النفسي ونشوف ممكن يجيب معاك نتيجة ولا لا، وأقسم بالله لو
بتطلع بتكذب عليا في حاجة أوصلك لمرحلة هتندم طول عمرك عليها!
منفقين؟

رد حسام بسخرية:

- توصلني لمرحلة أندم عليها؟ أساسا أنا في إيه دلوقتي!

يضحك بشدة ويكمل:

- عارف يا دكتور إنك تعيش يومك بصورة طبيعية وتقعّد مع الناس
يحسوا إنك مجنون لمجرد عارفين مرضك، أنا مش فارق معايا حاجة
ويا ريت تروحني.

أدار شوقي السيارة وأمسك بالمقود وبدأ يسير على الطريق متجها
لمنزل حسام ووصل وأنزله أمامه وتركه وسار بسرعة جنونية على
الطريق وحسام يخطو صاعدا إلى باب الشقة. دخل إلى غرفته
والإرهاق عليه، نام على السرير بالطول بعد خلع ملابسه.

ثم ما لبث أن دار بعقله الوسواس:

- على فكرة الدكتور شوقي دا من زمان وهو نصاب.. بقالك قد إيه معاه
وانت مش عارف تخف.. يابني فكك منه وشوف دكتور غيره.

نام حسام على السرير مغمضا عينيه وأمسك رأسه وبغضب قال:

- اطلع بقا سيبي عايز مني إيه.

اليوم المعتاد مع شروق الشمس، الساعة التاسعة صباحا، تدخل والدة حسام، خيرية، حتى توقظه من نومه ليفطر مع أبيه قبل أن يذهب إلى عمله وبصوت الأم الصباحي:

- حسام يلا يا حبيبي قوم الساعة بقت تسعة، أبوك مستنيك برا.

يفتح حسام عينيه ويغلقها من قوة الضوء الذي احتل أروقة الغرفة ويقول بصوت غاضب:

- ماما بعد إذناك اقفلي الشباك ميت مرة قولتلك طول ما أنا نايم في أم الأوضة متفتحيش الشباك.

ردت خيرية ضاحكة:

- طب قوم يا حيلة أمك تفطر لأن أبوك مش هينزل الشغل غير لما تاكل معاه.

قفز حسام ودخل إلى الحمام غسل وجهه ووقف ينظر إلى المرأة بلامحه السمراء ثم خرج لفايز الذي يجلس على السفرة الصغيرة بالخارج وعليها الإفطار منتظرا منذ فترة كبيرة، دخل حسام بصوت يملؤه الأرق:

- بابا أنا عايز اسافر البلد أقعد مع ابن عمي صادق عشان مخنوق ومحتاج أغير جو.

رد فايز متعجبا:

- إيه الطلب الغريب دا! طب اقعد افطر وبتكلم.

- لا يا بابا أنا عايز أسافر النهاردة، هخش احضر الشنطة وأروح أركب أول قطر رايح البلد.

- طب استنى أكلمهم في الشغل آخذ إجازة وأروح أوصلك بالعربية وبلاش القطر، انت شايف كل يوم حادثة.

ترك حسام أباه وهو حائر في حديثه وطلبه للسفر في هذا التوقيت، ويفكر: "ماله حسام ملامحه غريبة، مخيفة، مرة واحدة عايز يسافر! مع إنه عمره ما طلب السفر، كان دايمًا احنا اللي بنسفره.. اهدا يا فايز متقلش نفسك كويس برضه خليه يغير جو ويروح لابن عمه صادق".

انتهى من حديث روجه واتصل بعمله وحصل على الإجازة، كان حسام على الفور واقفاً في الخارج يحمل حقيبته بها ملابسه وأدواته الخاصة وخيرية خلفه متعجبة حتى أقنعها فايز بأنه محتاج لتغيير جو وفرصة للراحة وأنه ذاهب لابن عمه.

نزلا سويا أسفل العمارة وركبا السيارة وبدأ يسيران على الطريق ساعة وراء الأخرى حتى حل الليل عليهما وهما في مدخل القرية التي يعيش فيها ابن عمه، ولما وصلا كان صادق أول الحاضرين في استقبال حسام لأن فايز أخبره تليفونيا بأنهما قادمان ومعه أبوه الحاج شلبي على باب الدوار الكبير وبصوت مشتاق قال:

- ازيك يا ابن امي عامل إيه يا فايز يا اخوي والله واحشني كثير.

قام فايز بعناق شلبي وصادق عانق حسام وصعدوا سويا إلى الدور الأول من الدار لكن فايز طلب المغادرة لأنه على موعد في عمله غداً في الصباح الباكر وودعهم ووصاهم على حسام.

دخل حسام إلى غرفة صادق حتى يشاركه فيها ثم وجه حديثه له قائلاً:

- عارف يا ابن العم أنا صحيت لقيت نفسي بقول لأبوياء عايز أسافر البلد مش عارف ازاي لغاية دلوقتي.

رد صادق ضاحكاً:

- يا ولد العم أكيد وحشناك!

رد حسام مبتسماً:

- لا والله أنا متعجب والأغرب كمان إن بابا معترضش وأقنع كمان أمي إنني أسافر.

- المهم إنك جيت محتاج أتحدث معك كثير.

قال حسام متساءلاً:

- صحيح هو فين مرات عمي وبنت عمي.

- مسافرين بيزوروا خالتي في إسكندرية وأنا وأبوي بس اللي قاعدين هنا.

أدار حسام رأسه على أول السرير وينظر للسقف وهو راقد ويقول:

- المهم أنا عايز أنام لأنني تعبان جدا من السفر، متعرفش الطريق كان طويل ازاي.

الساعة السادسة صباحاً، أصوات العصافير تزقزق فوق الأراضي الزراعية المحيطة بدوار شلبي والشمس بدأت في الدخول إلى الغرفة

التي يرقد بها حسام وصادق بجانب بعضهما على السرير حتى أحس حسام بصوت في عقله: "اصحى يا بني انت إيه اللي جابك هنا يا حسام اصحى فوق".

حدق حسام عينيه وأخرج زفيراً غاضباً وهو يفكر في هذا الصوت الموسوس الذي لم يتركه من صغره، يحرك شفثيه قائلاً:

- ابعدي عني بقا مش عارف أعيش بسببك، ارحمني يا رب أنا تعبت.

ثم وقف واتجه ناحية النافذة وفتحها وأخذ أنفاساً صافية من هواء الغيطان الزراعية، وفجأة حدق عينيه من جديد وسأل نفسه: "إيه المكان الغريب اللي هناك دا!" وبصوت عال يوقظ صادق قائلاً:

- ولا ولا قوم يا صادق اصحى بسرعة!

انتفض صادق من نومه وهو يردد:

- في إيه مالك تعبان؟

رد حسام مترجياً:

- قوم بسرعة تعالى شوف لقيت إيه في الشباك!

رد صادق بصوت متعب:

- أشوف إيه سيبيني أنا عايز أنام.

رد حسام غاضباً:

- قوم يا بني بسرعة قبل الشبورة ما تخفيها!

- يا بوي إيه اللي يخنفني! حاضر انزفت وأقوم.

أسرع صادق ناحية حسام ووقف بجانبه أمام النافذة ويقول:

- في إيه بقا أنا صحيتك أهو؟

- إيه المكان الغريب اللي هناك دا؟

قال صادق ضاحكا:

- انت بتسأل ليه عنه يعني؟

رد حسام بغضب:

- إيه بجد قول يا عم انطق أصله غريب أول مرة أشوفه عندكم!

رد صادق غير متزن:

- أنا اقولك يا صاحبي، المكان دا بيظهر من الساعة أربعة الفجر لغاية الساعة ٧ كدا اسمة "حارة الوسواس"، متسألش اسمها كداليه عشان معرفش.

ويذهب مرة أخرى إلى السرير ويجلس ويكمل:

- بس لما كنت بتيجي عندنا مكنتش بتشوفه لأن احنا مكناش بنصحى بدري، اللي أعرفه عنه من واحنا عيال يقولوا لينا او عوا تروحوا في الوقت اللي بتظهر فيه عشان أعوذ بالله عفاريت وأنا الصراحة مجربتش أروح.

يطقطع جسده ويكمل:

- متركزش يا حسام معاها هو خلاص كدا اختفى بعد الشبورة مش بيظهر تاني وببيقا مكانه أرض فاضية ودلوقتي بتطلع الناس لأراضيها عشان الشغل، يلا نكمل نوم أحسن هقع من طولي.

- لا مش عايز أنام اقعد شوية.

- ارحمني يابني أنا نمت بعدك بكتير امبارح يلا ننام.

قال حسام غاضبا:

- قولتلك مش هنام متخنتيش روح انت!

- خلاص ياعم بلاها نوم مالك فيك إيه!

- أنا تعبت يا صادق من المرض اللي عندي من صغري، الأصوات التحكيمية في عقلك اللي مش بتفارقك، كل ما أبقا لوحدي ولو حتى وسط الناس، بتخليك مخيف، بحس حد في عقلي.

ويصمت لدقيقة والدمعة في عينه ويكمل:

- وكمان بيشككني في كل فعل بعملوه، يشنجنني، مقدرش أتحكم في أعضاء جسمي، كلها بتتحرك لوحدها، زهقت مش عارف أعيش زي الناس.

قاطعاه صادق:

- اهدا يا حسام انت مش فيك حاجة ولا مريض كلها أوهام بتوهم نفسك بيها.

رد حسام بسخرية:

- اه أوهام تصدق عندك حق، لدرجة إنني بصحى رغبتني في حاجة أنا في الأساس مش عايزها وبتجبر عليها زي مثلا إنني لغاية دلوقتي مش عارف أنا هنا ليه!

قال صادق لامسا كتف حسام:

- معلش يلا بس ننزل نفطر ويحلها ألف حلال، دا أنا هعمل معاك الصبح اليومين اللي انت قاعد فيهم معايا.

ضحك الاثنان وخرجا سويا وحضر صادق الفطار وأيقظ شلبي من النوم وتناولوا الإفطار وظلوا يتحدثون حتى أذان العصر، بعدما طلب شلبي منهم الذهاب إلى الجامع لأداء الصلاة، وذهبوا إلى الخارج وتوجهوا إلى الجامع الذي يبتعد عن الدوار بمائة متر، دخلوا إلى الحمام للوضوء بعدها خرجوا لساحة الجامع حيث أدى كل منهم صلاة السنة قبل قيام صلاة العصر ووقتها أقام الإمام الصلاة وصلوا جميعهم وانتهوا منها وجلسوا حتى يستمعوا خطبة نهاية الصلاة.

جلس الشيخ يحدثهم عن أهمية أداء الصلاة وعدم الاستسلام للشيطان ووسوته وإقامتها في مواعيدها وفي التو واللحظة حتى قاطعه حسام قائلا:

- مهما صلينا وقرينا من ربنا هيفضل مسيطر على عقولنا يا شيخ متتعيش نفسك في الكلام!

ابتسم الشيخ بلحيته الخفيفة قائلا:

- فعلا يابني قدر يسيطر على عقول الناس بس لسة في أشخاص مؤمنين بجد، قلوبهم صافية، عقلم خالي من أي معصية، قلبهم جنة زي ما وصفها الرحمن فعلا. ربنا خلق الشيطان عشان يحارب الإنسان على الأرض وتحدى وقتها ربنا بس برضة خلق المضاد وهي الصلاة يعني مثلا لو قولنا إنك بتصلي كل فرض بفرضه لمدة سنة مسبتش فرض وجيب واحد تاني بيصلي لمدة سنة بس متقطع وواحد تالت مش بيصلي لمدة سنة، التلاتة عمر الشيطان ما يقدر يوسس ليهم زي بعض، كلها درجات، الأولاني مش هيقدر يسيطر على عقله، الثاني هيقدر يسيطر على عقله بس مش في كل الأوقات عشان جواه حنة منورة، التالت ربنا يرحمه ويسامحه، يا ترى يا ولدي انت أنهي شخص فيهم؟

ظهر الذهول على حسام بعد انتهاء الشيخ من الرد على سؤال حسام وعدم استطاعته بالرد عليه، أنهى الشيخ حديثه بابتسامة والدعاء، وذهبوا الثلاثة إلى المنزل، سعد حسام وصادق إلى غرفتهما حيث قال صادق متساءلا:

- مردتش على سؤال الشيخ ليه؟

- مش عارف حسيت إن لساني اتشل على الرد!

قال صادق ضاحكا:

- بس هو إيه رده كيفك يا ابن العم؟

رد حسام ضاحكا:

- عيب يا جدع انت راجل صعيدي إيه كيفك دي؟!

- شوفت انت دايما فاهمني غلط ازاي؟

- أنا انام شوية عشان نسهر بليل نحكي كتير وأنا منمتش امبارح كويس.

صادق ترك حسام بالغرفة نائما على السرير لكن أتاه صوت الوسواس:

- إيه حكاية الحارة دي، واسمها الوسواس كمان، أكيد وراها سر، عايز أخشها.

حسام يرد:

- تخش إيه يابني فكك منها صادق قالي اللي بيخشها مش بيرجع منفكرش فيها.

رد الوسواس:

- انت بتصدق كلام صادق؟ دي اسمها حارة الوسواس يعني لازم تخشها أكيد مرتبطة بمرضك.

رد حسام غاضبا:

- ابعد عني سيبيني اطلع بقا من دماغي بقولك!

وبدأ يتمم في سره ببعض آيات قرآنية ويستنشق شهيقا حتى أغمض عينيه ونام.

"اصحى.. اصحى.. حارة الوسواس لازم تعرف سر الحارة.. اصحى..

اصحى.. حارة الوسواس.. اصحى"

حسام يهز رأسه يمينا ويسارا غير مستوعب الصوت وحنق عينيه، وجد صادق نائما برفقته وينظر إلى الساعة المتعلقة بالحائط وجدها تدق الرابعة فجرا يحدث روحه بنفس يملؤه الضيق:

- إيه! أنا نمت كل الوقت ده! ١١ ساعه ازاى! اه جسمي وجعني أوي، مش قادر أتحرك، حارة الوسواس مبتفارقش عقلي، يا ربي أنا تعبت.

وقف حسام وذهب ناحية النافذة ليرى حارة الوسواس التي ستبدأ في الظهور، ظهرت والنيران تضيئها والدهشة تملك حسام، عندما قال صوت الوسواس:

- انزل روح شوف إيه حكايتها، صادق نايم، انزل قبل ما تختفي اتحرك!

يمسك حسام رأسه، الصوت يعلو بعقله أكثر وأكثر، وأغلق النافذة بغضب واتجه عند حافة السرير وجلس وصوت الوسوسة تحكم في عقله. الوقت يمر وبدأ النور في السطوع، الساعة السادسة صباحا، حسام مازال جالسا والجهد والتعب عليه "حارة الوسواس..حارة الوسواس"، الصوت يرجع من جديد بقوة يجبره على الدخول للحارة، ضعف لمن هو أقوى، استسلم حسام ووقف منتفضا من مجلسه مسرعا إلى الخارج، جرى على السلالم، اندفع إلى الطريق يسير ناحية الحارة بكل قوة، وصل قبلها بعشرين مترا يفكر: "أدخل ولا مدخلش؟ بس أنا لازم أعرف السر، اسمها أصله غريب أكيد بيخص مرضي، واشمعنا المكان دا اللي صادق حذرني منه؟ لازم أخش، أنا مش بخاف، أنا عايش كدا أو كدا ميت في الحياة، بس استنى، لو دخلت هختفي معاها! مش مهم لازم أعرف سر حارة الوسواس".

جرى حسام بكل قوة قبل أن تختفي ورمى بجسده داخلها وهو يقول:

- أنا مش خايف! جاي يا حارة الوسواس!

أصوات متذبذبة في عقله توقظه، فتح حسام عينيه بعد دخوله حارة الوسواس قبل اختفائها بلحظات، رأسه تهتز متعجبا مما رأى، حارة كبيرة، البيوت على جانبيها، الغمامة تشبه السحاب الذي يصاحبه سقوط أمطار فوقها كظل يغطي أرضها لا يدخل الشمس بها، يسير ببطء، لا يوجد أي شخص معه، الخوف في ملامحه بارق، يا للهول إنها بالفعل حارة الوسواس، لكن غريبة بيوتها خشبية مبنية على الأرض مساحتها تتعدى الألفين كيلو فقط.

يلتفت حوله وحيدا في الطريق، وجد محلات من الخشب أيضا مفتوحة على مصارعها لكن فارغة من البشر، ازداد تعجبه، ينادي بأعلى صوت:

- حد هنا؟! يا ناس، حد سامعني!

جلس يفكر بما رآه ويحدث نفسه:

- إيه المكان الغريب دا؟ البيوت كلها من الخشب، مساحتها كبيرة، مفيهاش ناس، نورها ضعيف، مفيش شمس، يا ريتني ما دخلت.

وفجأة سمع صوتا في عقله يقول له:

- متندمش على دخولك الحارة.

ساد الغضب عليه وهو يقول بكل قوة:

- ابعد عني سيبيني في حالي.

انفعل أكثر وبدأ يطرق على أحد البيوت حتى فتح من شدة الطرق،
صوت زئير الباب، الظلام بالداخل، يخطو خطوات بها رعدة جسدية
ويردد بصوت منخفض:

- حد هنا؟ حد سامعني؟

رد صوت به سخريه وضحكة عالية:

- محدش هيسمعك هنا غيري انت في حارتي يا حسام.

يلتفت بجسمه في الجوانب ويقول:

- انت مين؟

رد الوسواس:

- أنا مالك الشر في عقلك، أنا اللي عمرك ما تقدر عليا، أنا قرينك
الموسوس، أنا الوسواس.

حسام يرجع للخلف خطوتين واندفع ناحية الباب لكي يخرج، أغلق الباب
والصوت يعلو في المنزل:

- أنا الوسواس.. أنا الوسواس.

يمسك رأسه ويصرخ بقوة:

- يا بني اخرج.. حد يلحقني!

حتى سقط مغشيا عليه على الأرض.

صوت رجال وصياحهم والأحاديث التي يسيطر عليها الصوت العالي مع بعضهم البعض في أذن حسام وهو نائم على الأرض، لم يستطيع أن يقف من التعب الجسدي المحطم له، حتى وجد شخصا يسمك به من الأرض ويحمله نصفاً ويضعه مسنداً على الحائط الخشبي بالمنزل ينظر حسام ليرى من هو رجل مسن في العقد الخمسين من عمره أسمر اللون والشارب على وجهه صغير الحجم، يرتدي جلباباً، في إصبعه خاتم فضي لامع مثير للملاحظة، وبصوت قلق يقول:

- خير يابني مالك أنا معدي لقيتك مرمي هنا.

- أنا اسمي حسام.

- إيه اللي عمل فيك كذا يابني؟

- معرفش أنا كنت قاعد عند عمي سمعت عن حارة الوسواس، حذروني منها كتير إني مخشش فيها بس اندفاعي دخلني، جيت لقيت نفسي هنا.

وأضاف بعجب:

- انت مين؟

رد الرجل ضاحكاً:

- أنا عمك فتحي.

- أهلا بيبك يا عم فتحي

- بيقا انت غريب عن الحارة، لسه وافد جديد، إيه يابني اللي رماك في مكان الشيطان!

- ليه ماله يا عم فتحي؟!

عم فتحي صمت لمدة دقيقة ثم قال:

- حارة ملعونة مغضوب عليها مسكونة بالشياطين، والأصعب إن الشياطين انت بتتعامل معاهم كل يوم، هما أهلها اللي عايشين فيها، اللي حاين كل حاجة غلط حرام تغضب ربنا، جيت ليهم ليه برجليك يابني!

رد حسام غاضبا:

- أنا مجيتش بمزاجي اللي جابني هنا من يوم ما سبيت القاهرة لغاية ما جيت الصعيد عند عمي صوت مسك عقلي يوسوس ليا "خش الحارة يا حسام"، فهمتني؟

رد عم فتحي ضاحكا:

- متقلش يا حبيبي كلنا كدا دخلنا زيك وهتمشي في الحارة وهتمشتر الناس وهتمشتر حكاية كل واحد.

وأخذ شهيقا وأكمل:

- بس لازم الأول تعرف تعيش فيها ازاي..

رد حسام متسائلا:

- ازاي ممكن أفهم؟

- العيشة في الحارة عبارة عن مراحل لازم تعلمهم، وكل مرحلة مش بتنفذها بنقل لحد ما توصل للموت.

قاطعہ حسام:

- موت ازاي؟

- بتمر في الحارة بتلات مراحل: الأول وسوسة الشيطان، يعني يقعد يوسس ليك في كل حاجة غلط من الدرجة الأولى البسيطة زي الزنا وشرب المخدرات والخمر والسرقه، منفذتش بتنزل للمرحلة الثانية وهي وسوسة الأذى، دي أسوأ مرحلة، لازم تنفذ وسوسته من قتل وتحريض عليه وأذية الأشخاص البشعة يدريك يوم واحد بس لو مقدرتش تقتل أو تأذي تنزل للموت، ودي بقا الوسوسة القاتلة، تعيش من غير أكل ولا شرب، بيتحكم في عقلك، يرسمك الموت، لحظاته متفرقش عقلك بتفكر فيه لغاية ما يبجي ميعادك ويفضل يوجهك لحد لحظة موتك اللي الله أعلم بتبقا ازاي، عشان وقتها محدش ببشوفك، بتخفي كأنك مجتش الحارة ودخلتها.

ويتنهد ثم يكمل:

صياح الموت وما أدراك منه، لما الناس كلها تخش البيوت بيحصل صياح جامد مخيف مرعب شيطاني، اعرف وقتها إن في حد وصل لوسوسة الموت ومنفذ تعليمات الشيطان وهيموت وملقاش منجي ليه.

حسام يستمع لحديث عم فتحي والخوف في قلبه يسير مع دمائه، لا يستطيع التفوه، العرق يزداد عليه، رجع خطوتين للخلف بعد أن وقف على وقال:

- يعني أنا لو منفذتش وسوسته في المرحلتين الأولى والثانية أموت؟

رد عم فتحي:

- لا مش هتموت إلا إذا قدرت تعدي مرحلة وسوسة الموت بسلام

رد حسام متعجبا:

- دي أعديها ازاي وانت بتقول صعب!؟

- ربك المنجي وربك الستار على عباده، اللي خلق الإنس والجان يقدر
ينجيك، هسيبك أنا، وقت ما تحتاجني هتلاقيني في بيت رقم عشرين
آخر بيت في الحارة ناحية الأرض الزراعية.

- طب أنا أروح فين دلوقتي؟

- تعالى في الليل نام عندي أكيد مش هتفهم الحارة حاليا لأنهم كل واحد
في مرحلة مختلفة مبيحبوش غير نفسهم ممكن حد يأذيك، شخص يقتلك
عشان ينجي نفسه من وسوسة، عشان كذا خليك يابني تعيش الواقع
بنفسك وانت لما تيجي نكمل كلامنا، امشي فيها وشوف الناس وخلي
بالك من نفسك.

خرج عم فتحي من المنزل وترك حسام بمفرده حائرا خائفا مرعوبا مما
قاله له عم فتحي وبدأ بالتحرك خارجا للحارة ليشاهد أهلها الذين
يسكنونها، جميع أبواب بيوتها مفتوحة، أهلها يرتدون جلبابا لونه أسود
خفيف، ساحة المحلات امتلأت بأهل الحارة لكن الغمامة لم تتركها.

يسير حسام والجميع ينظر عليه لأنه مازال يرتدي ملابسه الخاصة
يعرفون بذلك بأنه جديد على الحارة، الخوف يقتله أكثر من نظراتهم

حتى سمع صوت الوسوسة: "يا ترى هتعمل في كلام عم فتحي إيه انت خلاص في الحارة".

وقف حسام في مكانه يفكر: "أعمل إيه أنا تعبت.. أعيش موسوس خاضع لكلامه ولا أعمل إيه! أنا مستحيل أنفذ اللي هيقول عليه، اه يا دماغي".

حتى استوقف أحد أهل الحارة قائلاً:

- لو سمحت أنا جعان مفيش محل أكل فيه هنا؟

نظر إليه الشخص والضحك عليه مستهزءاً بحديثه الذي استقبله حسام بحالة دهشة رهيبة ويقول:

- أنا قولت نكتة! شكله راجل عبيط.. استنى أوقف حد تاني.

اتجه ناحية بنت واقفة بظهرها عند مدخل أحد البيوت وبصوت متعب قال:

- لو سمحتي ممكن تقولي لي مكان محل أكل في الحارة؟

استدارت البنت بشعرها الطويل وجهها الأبيض ونغزتها على خديها وشفتها الصغيرة تنظر لحسام وتهز رقبتها.

رد حسام رافعا حاجبه:

- طب هزة رقبتك دي استغراب ولا قصدك مفيش محلات في الحارة؟

نظرت للأرض وضحكت وقالت:

- انت مين يا أخ تايه ولا إيه؟

رد حسام غاضبا:

- أنا بقولك عايز أكل تقويلي تايه!

ردت البنت:

- أصل انت بتسأل سؤال غريب أوي!

- إيه الغريب فيه أنا جعان!

- لا لأن أصلا مفيش محلات أكل في الحارة.

رد حسام بسخرية:

- اه فهمت وانتي بتاكلي منين؟

ردا البنت غاضبة:

- أنا باكل من عند... ولا بلاش أمسك لساني.

رد حسام غاضبا:

- فهميني وانجزي أنا جعان!

ضحكات البنت تعلو بشدة وتنظر بتدقيق وتقول:

- يابني انت جاي منين بقولك مافيش محلات أكل اه انت شكلك بلبسك

دا جديد على الحارة.

- أنا بدأت أتوتر واتخفتت..

- بقولك إيه روح شوف أي حد ثاني واطلع من دماغي!

رد حسام بصوت عال:

- انتي بتكلميني كدا ليه يا بت انتي!

رد البننت باكية وتنادي من داخل البيت:

- يا بابا .. يا بابا الحقني!

خرج عم فتحي من داخل البيت فرآه حسام فاندفع عليه بكل قوة:

- عم فتحي الحمد لله إني شوفتك، أنا هموت من الجوع وعايز أكل قولي
منين الأكل؟

- اهدا يابني تعالى خش جوا نتكلم.

حسام دخل مع عم فتحي للبيت ورأى البننت تدخل معهما، وجه لها
سؤالاً:

- انتي رايحة فين كمان هتدخلي معنا!

قاطع عم فتحي ضاحكا:

- يابني اهدا تعبتني دي بنتي.

ظهر الخجل عليه ويفكر في هذا الموقف المرحج الذي حدث مع البننت
قائلاً:

- أنا آسف يا أنسة

البنت لم ترد عليه وتركتهما وذهبت للخارج من جديد وطلب عم فتحي من حسام الجلوس بجانبه على الأرض وبدأ يروي:

- بص يا بني أقولك، هنا في الحارة مفيش أكل، كل يوم بعد نهايته أهلها بيخشوا بيوتهم، شايف الركنة المتغطية اللي هناك دي؟ تلاقي الأكل هنا، بس بشرط يكون كل شخص عمل قدر كبير من الوسوسة و نفذ تعليمات الشيطان، فهمت؟

رد حسام متعجبا:

- طب انتو عايشين ازاي كدا!

- قدرنا ورضينا بيه..

- واشمعنا مبقتش زيكم؟

- انت النهاردة تعتبر من أهل الحارة، من بكرة هتبدأ تخش في أول مرحلة انت حاليا إيمانك قوي جواك، لازم الشيطان يسبيك يوم كامل تفهم طريقة العيشة في الحارة.

- يعني أنا من بكرة أخش في أول مراحل الوسوسة وقواعدها؟

- أبوة، أنا كدا فهمتك كل حاجة عن الحارة، وخلي بالك من نفسك عشان من بكرة هتبدأ تتعامل مع أهلها.

حسام وضع يديه على رأسه والحيرة في عقله عما تحدث عنه عم فتحي، ومن غدا سوف يدخل أولى مراحل الوسوسة وسيتحول لشخص

آخر، ونسي أنه جائع ورقد على الأرض ضاماً رجليه ومنزويماً في ركن بساحة البيت حتى غاب وعيه.

"سؤال نفسي أفهمه، ازاى حارة في الصعيد واسمها الوسواس، في تناقض كبير بين الكلمة والمكان اللي بنتواجد فيه، يعني حارة كلمة شعبية تطلق على أي عمل عامي للناس، والوسواس كلمة علمية اتكلمت عنها كتب كتير، والأصعب المكان، ليه موجودة في الصعيد المصري وإن في الأساس مفيش في الصعيد حواري دي موجودة في العاصمة بس، وكمان ازاى بتختفي بعد الساعة سبعة وتظهر أربعة الفجر!

يااه ده لغز كبير، أنا داخل على ٢٠ سنة بدرس مرض الوسواس وعمرى ما فكرت أتكلم عن المنطقة الغربية دي، خوف منى ولا أصلاً هي مش موجودة؟".

جلس الدكتور شوقي في منزله يفكر في حديث أحد المرضى معه فيما يخص حارة الوسواس وأنها متواجدة بالصعيد عندهم ومعروفة هناك بينهم حتى رن تليفونه المحمول ورد قائلاً:

- أيوة يا فايز أخبارك؟ ازاى! حصل امتى؟ حاضر اهدى بس أنا جايلك..

أغلق التليفون وأسرع لغرفته وارتدى ملابسه وذهب للخارج لمنزل فايز.

مازال حسام نائماً لأكثر من ثمان ساعات حتى بدأت غرام في إيقاظه قائلة:

- انت يا أخ.. انت يابني اصحى عشان تاكل.

استيقظ حسام من النوم قائلاً:

- براحة انتي داخله خناقة!

ردت غرام ضاحكة:

- أمال أصحيك ازاي؟ كنت واجع دماغي، جعان، الأكل وصل، قوم كل.

- اه أوي هو فين الأكل؟

غرام أعطته رغيفا من الخبز لونه أخضر يشبه التعفن وقطعة من الفراخ تشبه الحامضة لكن بدون رائحة وإناء به ماء أصفر اللون، أمسك حسام بالطعام متعجبا موجهها حديثه لها:

- إيه الأكل اللي شكله بايظ دا هو بيتاكل؟

- معلش هتتعود عليه نصييك إنك جيت الحارة.

- لا مش هقدر آكله كله أنا ممكن أموت!

ردت غرام ضاحكة:

- لا متخافش أنا عايشة قدامك أهو وكل يوم بيتغير الأكل، على فكرة أبويا الراجل الغلبان ادالك نصيبه النهاردة واكتفى بالمياه.

حسام يشم بأنفه الأكل فلم يجد رائحة له، يستطعم ويأكل طعمه رائع، يأكل أكثر مثل الذي لم يرَ طعاما من سنين ويقول:

- الأكل جميل أوي الصراحة!

- شوفت صدقتني؟

- بس في حاجة غريبة أنا كنت حسيت شبعت بسرعة!

- لا انت هتشبع بسرعة وكمان مش هتجوع غير تاني بليل.

- هو دا أكل الشيطان اللي عم فتحي قالي عليه؟

- اه هو اللي كل الحارة عايشة عليه، انت من وقت أكلك خلاص بقيت واحد من أهل الحارة، بس للأسف الشيطان اتحكم في عقلك عشان أكلت من أكله، من بكرة هيطبق عليك مراحل الوسوسة أهلا بيك في "حارة الوسواس".

رد حسام غاضبا:

- اه انتي هتقوليلي برضه كلام عم فتحي، أنا مستحيل أنفذ كلامه، واطمني قبل حتى ما أدخل هو متحكم فيا.

- خلاص يا حسام هتتنفذ غصب عنك بعد ما أكلت أكله لو منفذتش هتنزل لمرحلة وسوسة الموت، واللي بيوصل للمرحلة دي بيموت، محدش نجي منها من الحارة، نام وبكرة هتجرب كل حاجة بنفسك، اه صحيح وسوسة هنا غير برا.

رقد حسام مرة أخرى على الأرض للنوم ويفكر بما سيحدث غدا في أول يوم بدخوله أولى مراحل الوسوسة وهل سيستسلم لها ولعبث الشيطان بعقله أم يقاومه، لكن لا مفر من الموت بمقاومته!

مر الليل سريعا على حسام الذي ظل يقظا حتى جاءت الساعة الرابعة فجرا، سمع صياحا شديدا في أحد البيوت المجاورة فانتفض من مجلسه وذهب ناحية غرفة عم فتحي وطرق بشدة وهو يقول:

- عم فتحي افتح!

فتح له قائلاً:

- في إيه يا حسام!؟

رد حسام خائفاً:

- انت مسمعتش صوت الصياح ولا إيه؟

- اهدا يا حسام أنا قولتلك قبل كذا صوت الصياح يعني واحد هيموت من البيت بعد شوية بالظبط عشان أقل وسوسة.

حسام مازال متعجباً رغم علمه من قبل بما يحمله الصوت وأيضاً بما رآه في هذه الحارة المرعبة، تركه عم فتحي وأغلق الباب وظل جالسا على الأرض والخوف لا يفارقه كالعادة منذ دخوله للحارة.. مرت الساعتان سريعا والنهار في الظهور لكن الشمس غائبة والغيوم تسيطر على الحارة، أهلها خرجوا، الجميع يجري وراء المعاصي حسب المرحلة التي يعيش فيها للنجاة من مرحلة وسوسة الموت، استيقظ حسام وعم فتحي وغرام وأمسك بيده عم فتحي وقال:

- انت من النهاردة أول يوم ليك في الحارة، استعد وخلي بالك لازم تنزل تشوف وتتعامل مع الناس ووسوسة الشيطان في عقلك.

استمع حسام لحديثه وترك البيت وسار للخارج واقفا ينظر للحارة وبيبّط به خوف سائرا، الجميع واقف أمام البيوت، في جانب مجتمع بعض الرجال يضحكون ويتحدثون بصوت عال يسخرون بأنفسهم، وصل إلى ساحة المحلات التي تتواجد في أول الحارة، الذهول عليه، محل مساحته كبيرة به مجموعة من الكراسي والمناضد الخشبية يبيع الخمر بجميع أنواعها.

جلس الرجال والنساء يتخامرون بما حرمه الله والمحل الآخر نفس المساحة أيضا لكنه بدون أساس خشبي فارغ، يتواجد به مجموعة من الرجال ذوي البنية القوية يبيعون جميع أنواع المخدرات لأهل الحارة ووجوههم مغطاة بقناع أسود مكون من قطعة قماش.

يدير رقبته لهذه المنطقة المريبة فوجد ثلاثا من البيوت تحتلن النساء يجلسن أمامهن ويقفن يمسكن سجائر المخدرات يسحين الأنفاس، يشبهن أفلام السينما، وأكواب الخمر على أفواههن، أجسادهن عارية الصدر تماما لإغراء الرجال حتى يزنون معهن، الشهوة تنفجر بداخله، قلبه وعقله يتمايلون نحوهن، يشاهد الصدر العاري، العرق زاد على جبينه.

قال الوسواس:

- إيه رأيك في الحريم؟ شايف واقفين عاملين ازاى؟ معرية جسمها، بتبصلك، شكلها معجبة بيك، خش عليهم.

الوسواس يتفاعل مع عقل حسام برغبة الشهوة يدفعه إليهن، تأكل الشهوة بروحه، وجسده خرج عن سيطرته، اندفع عليهن قبل جسده يسير إليهن ببطء، لم يتمالك نفسه، ذهب ناحيتهن، يلتفون عليه كفريسة التي رأت عدوها، يتحسسن جسده، أدخلوه داخل أحد البيوت، قاموا بدفعه على

الأرض، جمعيهن يتسابقن لكسب رضا الوسواس للبقاء في المرحلة الأولى، خمسة عاريات عليه بإحدى الغرف المغلقة، نزعن عنه جلبابه، يستسلم لهن، الشهوة أفجعتنه، لم يعد مسيطراً عليها نام على الأرض يتناوبن ممارسة الجنس معه، الاستمتاع عليه، مر الوقت سريعاً، فتح عينيه، وجد جسده على الأرض راقداً ولا يوجد أي منهن معه، خرج من البيت يتوجع كيف فعل الفحشاء وزنى معهن حتى صرخ ويقول:

- حرام أنا عملت كذا ليه!

رد عليه الوسواس:

- اهدا بتعمل في نفسك كذا ليه! انت ضعفت قصادهم وأي شخص مكانك كان هيعمل زيك.

- لا أنا عمري ما كنت قذر زي النهاردة ومش هسيبك تتحكم فيا انت سامعني؟

ويمسك رأسه.

رد الوسواس:

- بص حواليك كلوا بيزني حد عمل زيك؟ خلاص انت عملت وعصيت.

- سييني أنا مش هبقا زيهم.. اطلع من دماغي!

أحس حسام أن هناك شخص خلفه، لف بجسمه، تفاعلاً بشباب قصير القامة وأسمر اللون مثله شعره طويل، قال حسام:

- انت مين؟

رد الشاب:

- أنا جورج.

- جورج مين مش ناقصاك!

- انت بتعيط ليه؟ شوفتك وانت خارج من بيت الحریم بتجري أوي
قولت آجي وراك أشوفك مالك.

- أنا عمري ما عملت حاجة غلط.. مش عارف استسلمت ليهم وليه هو
كمان سيطر عليا..

- انت شكلك جديد في الحارة..

- أنا بقالي يومين فيها.

- قوم امشي نتكلم مع بعض شكلنا هنبقا صحاب.

وقف حسام ويسيران ويقول:

- انت بقالك قد إيه في الحارة؟

رد جورج ضاحكا:

- أنا داخل على سنة.

رد حسام متسائلا:

- دخلت ازاي؟

يخرج جورج زفيرا ويروي:

- متفكر نيش.. أنا كنت في رحلة مع صحابي، كنا رايعين الأقصر، المهم راكبين الأتوبيس عمل بينا حادثة انقلبت، على حظي كنت قاعد ناحية الشباك قدرت أخرج منه، كان حوالي الساعة أربعة تقريبا الفجر، رجلي مش قادر أمشي عليها كانت شبه مكسورة، فضلت ماشي لغاية ما لقيت منطقة غريبة كدا شبه الحارة في دخلتها، دخلت بلف لقيت نفسي كل الأراضي الزراعية اللي شوفتها اخفتت لغاية ما عرفت إنني في حارة الوسواس.

- وانت كنت بتزني زيي هناك لما شوفتني؟

- اه كنت مع حطة بنت حلوة أوي هي اللي مهونة عليا القاعدة هنا.

- انت في أنهي مرحلة من الوسواس؟

رد جورج بتحديق:

- أنا وصلت للمرحلة الثانية، أول ما جيت الحارة كنت زيك بخاف من كل حاجة، ضميري بيأنب فيا، بس لقيت نفسي قدامي يوم واحد إما أنفذ أو أنزل مرحلة الموت، قولت خلاص لازم أتأقلم، ومن يومها بنفذ كل وسوسة بتيجي في عقلي.

- بس انت كدا ملكش أمان..

- ليه يعني مش فاهمك؟

- اللي أعرفه عشان تنجى من الرحلة الثانية لازم تقتل أو توسوس لشخص بالقتل أو تأذي أذى بالسكر.

رد جورج يحقق بخوف بعينيه:

- كان غضب عني لما اندفعت عليه وقتلته، حاجة مسكت دماغي ووقتها مقدرتش، خوفت إني أموت لما أنزل، دخل يضربني عايز مني البنات اللي منكرش إني حبيبتها، وقف يستفزني إني قصير وضعيف وبرضه المرحلة مخيفة، بإيدك فرصة يوم واحد لازم تنقذ نفسك فيه وإلا هتموت وكل اللي بينزل بيموت، جريت عليه ضربته بحديدة على دماغه مات، رجعت تاني للمرحلة الأولى، بعدها خدت قرار منزلش منها، صعبة أوي على فكرة يا صاحبي، ونصيحة اوعى تنزل.

- أنا عايز أخرج منها او أموت زهقت خلاص ومش هقدر أستحمل.

- انت ساكن في أنهي بيت؟

- في بيت رقم عشرين عند عم فتحي.

رد جورج والذهول عليه:

- عم فتحي! أنا في بيت رقم عشرة، أسيبك وخلي بالك من نفسك.

ترك جورج حسام واقفا متعجبا برد فعله بعد سماعه عن سماعه بعم فتحي حتى وصل عند الأرض الزراعية التي تقع في آخر الحارة، وجد أرضا جرداء مساحتها تتعدى عشرة آلاف فدان، ينظر إليها حتى وجد شخصا يرتدي قناعا أسودا في آخر الأرض من الناحية الأخرى، التعجب زاد على ملامحه يفكر: "ليه الراجل دا باللبس الغريب بتاعه واقف في آخر الأرض وليه الأرض بايطة حارة غريبة!".

فات اليوم سريعا وحل الليل على الحارة ودخلوا إلى بيوتهم ليأكلون ويشربون من يد الشيطان المحرمة، جلس حسام في بيت عم فتحي حتى خرج عليه وأعطاه الطعام قائلا:

- خد يابني أكلك أهو.
- هات ياعم فتحي أنا جعان أوي.
- احكي لي حصلك إيه النهاردة؟
- حسام جسده تكهرب من السؤال ورد:
- لا محصلش حاجة
- متكدبش عليا أكيد نفذت كلامه عشان جالك أكل.
- رد حسام يئسا:
- أنا زنيبت يا عم فتحي..
- بس معملتش حاجة تانية؟
- وانت عايزني أعمل إيه أكثر من كذا!
- نام عشان بكرة يوم جديد ليك في الحارة..
- رد حسام متسائلا:
- هو أنا لو مسمعتش كلامه هيحصلي برضه اللي قولت عليه؟
- أكيد يا حسام، دي حرب مع قواعده، صعب تهرب إلا بالموت..
- تمام أكيد في حل.

فات الليل بهدوء بدون أي صياح وأشرق النور بجوانب الحارة، استيقظ حسام على أصوات المارة بالخارج والضحكات العالية من بعضهم الواقفين أمام البيت، يتنهد وقت خروج غرام من الغرفة قائلة:

- صباح الخير يا أخ.. نمت كويس؟

- اه نمت كتير أوي.

- انت عملت إيه امبارح؟

- معملتش حاجة..

وأردف غاضبا:

- وياريت متسألش في حاجة تاني!

- أنا غلطانة، عمرها ما هنتكرر مني تاني، سلام.

أحس حسام أنه أخرجها بهذا الرد السيئ.

قال الوسواس:

- يا عم عادي هي بتتدخل في حياتك ليه!

- أيوة أنا غلطان ولازم أتأسف ليه.

رد الوسواس:

- تتأسف ليه انت اللي عملته صح، مسألتنش نفسك قبل كدا هي ازاي عايشة في الحارة من غير ما بتخرج تعمل زي بقية الحريم في الساحة عشان تعيش؟

- صح أنا ليه لغاية دلوقتي مسألتنش عم فتحي السؤال دا!

ويصرخ بصوت عال:

- عم فتحي.. عم فتحي.. عم فتحي!

خرج عم فتحي له مسرعا:

- في إيه؟

حسام يسأله:

- هو انت ازاي عايش في الحارة ومش بتخرج انت وغرام ولا بتتعاملوا مع أهلها زيي كدا عشان مراحل الوسوسة.

رد عم فتحي غاضبا:

- انت متسألنش السؤال دا تاني مفهوم؟ وإلا أطردك برا البيت!

خاف من ردة فعله الحمقاء وغير المتوقعة وانصرف مسرعا للخارج، يسير في الحارة، يشاهد البيوت الخشبية المرقمة حتى آخر بيت الذي يحمل رقم ٢٠ الخاص بعم فتحي، وبعد الأرض الزراعية عقله يفكر في جورج الذي اختفى من أمس، ينظر بين أهل الحارة لعل وعسى أن يلتقي به، وصل إلى مجمع المحلات الشيطانية بأول الحارة، يشاهد مثل امس الخمور والمخدرات والنسوة العراة ويوسوس له:

- خش شوف بيعملوا إيه في محل المخدرات.

يسير حسام ببطء ويدخل رقبتة داخلها، وجد مجموعة من الرجال يبيعون المخدرات لأهلها الذين يتمتعون بدخانه الكثيف بسيطرته على هواء المكان، دخل، ظل يكح ويمسك صدره ويأخذ أنفاسه والجميع يضحك عليه بسخرية ويقولون بأصوات متعددة:

- مالك يا حبيبي هتموت؟ لقله سيجارة يمكن تنجيه من الموت.. يا عيني الواد رفيع وشكله ضعيف.

مع حديثهم السخيف أحس بشخص يشده للخارج ويقول:

- إيه اللي جابك هنا يا حسام الحمد لله إني لقيتك!

يرفع عينه له لمعرفة فتفاجأ بأنه ابن عمه صادق، الذهول عليه، لم يقدر على التحدث لمدة دقائق حتى نطق:

- صادق! جيت هنا ازاي!

رد صادق غاضبا:

- انت جيت هنا ازاي رد عليا الأول؟!

- معرفش حاجة فضلت تقولي خش دخلت لما كنت نايم!

- أف شوفت غيابك وتسرعك جابنا فين، انت لما دخلت اتأكدت إنك هنا بعد ما صحيت ملقيتكش جنبي، الدنيا اتقلبت، أبوك وأمك جم وبلغنا الشرطة وأنا الوحيد اللي واثق إنك هنا.

- وهما عارفين إنك هنا في الحارة؟
- لا طبعا مكنش حد سابني أدخلك، أنا هربت الصبح وجيت من امبارح في الحارة.
- من امبارح يعني انت أول يوم ليك النهاردة في مراحل الوسوسة.
- يا بوي مراحل وزفت إيه أنا نايم في الدكان دا من امبارح ومستحمل قرف الناس دا بالعافية.
- صادق افهمني وفتح مخك والنبى، انت في الحارة بتعيش في ثلاث مراحل من الوسوسة، لازم تنفذ أي شيء عقلك يأمرك بيه غلط، انت في مرحلة وسوسة الشيطان لو منفذتش تنزل لمرحلة وسوسة الأذى ودي صعبة، لو منفذتش هتنزل لوسوسة الموت وكدا هتموت فهمتني؟
- رد صادق غاضبا:
- أنا مش فاهم حاجة اللي فاهمه إننا نخرج دلوقتي من المخروبة دي.
- مفهانش خروج خلاص لازم تعيش وتتأقلم يا بني فتح مخك الصعيدي بلاش تقفله.
- مفتحش مخي أنا أخرج يعني أخرج!
- حسام يخرج زفيرا والعرق عليه قائلا:
- أبوس إيدك افهم اعمل زي ما أنا اعمل بالظبط متفقين؟
- مفهوم نشوف آخرتها معاك إيه..

أمسك حسام بيد صادق ودخلا سويا لمحل الخمر وطلبا خمرا من أحد الرجال المقنعين وأعطى لهما كأسا من الخشب به خمر لونه يشبه الدماء وقال حسام:

- خذ اشرب معايا يا صادق..

صادق أخذ الكاس وينظر إليه متعجبا ورفع على فمه وشربه وبدأت حالة من الغيثنان تظهر عليه ويقول:

- مش شارب القرف دا!!

حسام أمسك بالكأس هو الآخر ويشرب ويستطعم الخمر فوجد أنه خليط من الدماء والخمر، رمى الكأس من يده وأمسك يد صادق وخرجا بالخارج ينسون ما بداخل الكأس الخشبي.

- دي مستحيل تكون خمرة أنا حاسس إنها دم!

- أنا قولت لك يا ابن العم احنا لازم نخرج أنا مش هعمل اللي الناس دي بتعمله مستحيل لو أموت!

- لا لازم تعمل عشان تعيش..

- اه معدتي وجعاني..

- انت كلت من امبارح؟

- لا مكلتش اه اه هموت الحقني يا حسام!

وقع على الأرض متوجعا من الألم بالمعدة فرفعه حسام على كتفيه
وذهب به مسرعا لعم فتحي ويصرخ:

- الحفني يا عم فتحي صادق بيموت!

- مين دا يابني حصله إيه؟!!

قال حسام غاضبا:

- شوفه الأول مش عارف أعمل إيه!

بدأ عم فتحي بإفافة صادق الذي كان مغشيا عليه. حتى فاق في لحظة
واستفرغ كل شيء بمعدته الخالية من الطعام وعيناه محمرنان ويقول:

- انت السبب يا حسام قولتلك مش عايز أشرب..

نظر عم فتحي قائلا:

- مين دا يا حسام؟

- صادق ابن عمي لسة داخل الحارة من امبارح ومكلش حاجة، لقيته في
محل المخدرات وهو في مرحلة الوسوسة خدته عشان يشرب خمره
حصله زي ما انت شايف.

- غلط يا حسام كان ممكن يموت لازم الأول ياكل من أكل الحارة بعد
كدا يعمل اللي عايزة على العموم سيبه يريح متخافش عليه بس انت
لازم تعمل معصية كبيرة عشان يجيلك أكل كثير وتأكله معاك.

اندفع حسام للخارج بعد أن طلب من صادق أن يستريح عند عم فتحي
يسير مثل المجنون يفكر: "أنا اعمل إيه دلوقتي لازم عشان الأكل يبجي
كثير لصادق عشان ياكل أعمل معصية كبيرة الواد هيموت".

وصل لساحة المحلات يلتفت يمينا ويسارا، أمامه ثلاثة: الزنا والخمور
والمخدرات، ماذا يفعل الثلاثة في مستوى واحد، في مرحلة وسوسة
الشيطان، يفكر: "وسوس بقا ليا" أحس بصوت يهز عقله:

- محتار؟ شوفت جيت ليا ازاي؟ امبارح خوفت من الزنا، دلوقتي تتمنى
تزني.

حسام يمسك رأسه ويقول:

- أعمل إيه عايز معصية كبيرة؟

رد الوسواس:

- ازني أو اشرب خمر أو مخدرات، اختار من الثلاثة أو اسرق.

انتفض حسام بجسده:

- اه هي السرقة طب اسرق ازاي وإيه؟

عينيه تقوم بتمشيط المكان، وجد امرأة في العشرينات من عمرها تقف
من خلفه، تفاجأ، رجع للخلف فزعا ويقول:

- انتي مين؟

نظرت إليه الفتاة العشرينية تتأمل بلامحها المشوهه بحروق كثيرة
دفتها وترتدي جلبابا أسود يظهر جسدها المشوه قائلة:

- أنا شيزارا.

- أبوة ماشي واقفة ليه ورايا؟

- مش انت عايز تسرق؟

الصدمة على حسام أفجعتة، لم يصدق نطقها قائلا:

- اه عايز أسرق، عرفتي منين؟

ردت شيزارا ضاحكة:

- لا انت جديد في الحارة لسه متعرفنيش كويس.

- أنا فعلا جديد بس مش فاهمك!

- أنا اللعنة، أنا الوسواس.

رد حسام متعجبا:

- انتي مين وعايزة إيه؟

- أنا جاية أساعدك على السرقة.

- هتساعديني ازاي؟

شيزارا تقترب من حسام وهو يبتعد برأسه خوفا منها وتقول:

- انت زنيـت امبارح وكان مقدارك كبير، النهاردة عايز تسرق عشان
صادق بس مش عارف، أنا اقولك، شايف القصر اللي ناحية الأرض
الزراعية دي؟

حسام ينظر إلى آخر الحارة فلم يجد قصرا كما تقول من الناحية الشمالية
من الأرض تعجب قائلا:

- فين القصر دا شكلها مجنونة!

ردت شيزارا ضاحكة:

- مش هتشوفه مفيش غيري يقدر يشوفه، هو مخفي بيظهر بس يوم
السبت وبيختفي بليل بعد انتهاء الحفلة العظيمة، يعم الفرحة للحارة،
محدث يقدر يخشه عشان اللي بيموت بس واللي يفكر يقرب منه مش
هيرجع غير بالموت ههههههه.

- انتي عايزة ازاي اخش أسرقه وهو مش موجود أصلا!

- لا انت متقدرش تخشه بس ممكن تعمل حاجة تانية..

- أعمل إيه فهميني؟

ردت شيزارا ضاحكة:

- تحارب اللعنة السودا.

وصوتها يعلوا أكثر أكثر:

- اللعنة السوداء.. اللعنة يا حسام.. اللعنة اللي هتموتك في الحارة.. اللعنة خلي بالك منها.

يستمتع حسام لما تقوله هذه الفتاة المخبولة ويتعجب ويفكر بما تقصد: "تقصد إيه باللعنة البت الغريبة دي؟! أنا لازم أفكر بسرعة، أسرق إيه الوقت بيجري، بعد كذا أفكر في كلامها العبيط دا".

يلتفت ويرفع عينيه للحارة حتى قرر أن يدخل إلى محل الخمر موجهها حديثه للبائع:

- لو سمحت عايز كاس خمرة.

أعطى له كأسا بدأ يمسكه ويفكر: "أنا كذا أشربها مش سرقة برضه دي حاجة عادية هتفيدني أنا اففف"

شرب كلها في مرة واحدة، أحس أنه يشرب خليطا من الدماء داخلها حدق عينيه ويخرج زفيرا، أحس في تلك اللحظة أن عقله تجمد لا يقول سوى:

- عايز كاس تاني.

أمسك بالثاني وشربه وطلب بعدها الثالث، زادت عنده حالة من عدم الاتزان، ضحك هيسثيري، يرقص مع المخمورين، حالة من السكر الفائقة سيطرت على أعضاء جسده، الجميع يسخر منه، يسير للخارج ويترنح يمينا ويسارا حتى اندفع على إحدى السيدات الواقفات على أبواب بيوتهن الخاصة بهن، أدخلها إلى البيت ودفعها على الأرض وتعدى عليها بالضرب ففقدت وعيها وقام باغتصابها، انتهى من

جريمته، يخرج أنفاسه، وجد معها سلسلة من الذهب الخالص وعليها صورة أحد الاطفال، نزعها من رقبتها وأخذها وفر هاربا للخارج.

الليل قد حل عليه وهو بالداخل ولم يحس، سار يجري بجنون، الحارة بدأت في الهدوء، الجميع دخل لبيوته، وصل لبيت عم فتحي، دخل، وجد صادق جالس يحاكي عم فتحي، منظره مريب، قال صادق:

- مالك يا حسام حصل حاجة معاك؟

- لا لا مفيش أنا كويس..

- مش باين عليك إنك كويس!

رد حسام غاضبا:

- قولتلك أنا كويس!

دخل حسام إحدى الغرف، جلس على الأرض يبكي بحرقة على ما فعله في تلك السيدة وأخذ السلسلة منها.

قال الوسواس:

- مالك زعلان ليه؟ انت لازم تعمل كدا عشان خاطر ابن عمك

حسام يطرق بيده على الأرض بقوة:

- سييني متكلمنيش!

- خلاص كنت سيب ابن عمك يموت وهو داخل عشانك في الأساس وانت السيب.

حسام يصرخ بقوة:

- أنا مش السبب انت السبب سييني بقولك!

دخل صادق وحسام جالس على الأرض والدموع في عينيه ويقول:

- عملت إيه ممكن تحكيلى..

- عملت مصيبة يا صادق.. اغتصبت واحدة ست وسرقت السلسلة بتاعتها..

- سمعت كلامه واستسلمت لوسوسته ليك..

رد حسام غاضبا:

- عشانك.. خايف عليك.. ممكن تموت.. انت مش فاهم حاجة.

رد صادق غاضبا:

- أنا أكل من أكله لكن مش هستسلم لوسوسته حتى لو أموت، على الأقل أموت وأنا راضي على إني قاومته.

- دا كلام مجرد كلام، تاكل الأكل بيسيطر على عقلك وأفعالك وعشان هو لعين!

- لا يا ولد العم لعين على الضعيف وأنا مش ضعيف.

دخل عليهما عم فتحي وقطع حديثهما وهو ماسك للطعام وناول له لحسام قائلا:

- انت عملت إيه عشان يجيلك الخير دا كله!

حسام لم يرد عليه وأخذ يتناول الطعام وأعطى لصادق جزءا منه وأكل هو الخبز فقط ويقول:

- كل يا صادق عشان بكرة أشوف هتقدر ولا لا..

خرج عم فتحي وظل الاثنان يأكلان وانتهيا وخذوا للنوم لبداية يوم جديد في حارة الوسواس.

اليوم الثالث في حارة الوسواس، استيقظ حسام، تفاعبا بصادق يقظا لم ينم منذ أمس فوجه حديثه له:

- منمتش ليه؟

- هيجيلي نوم ازاي واحنا في الحارة الغربية دي!

- فعلا بس خلاص لازم تتأقلم وتعيش هنا مفيش رجوع لحياتنا تاني..

رد صادق غاضبا:

- لا لا يا ابن العم أنا أخرج حتى لو فيها موتي.

- تعالى بس نخرج برا الحارة نشوف الدنيا عاملة إيه..

سحب حسام صادقاً من يده وخرجا يسيران بخطوات بها تدقيق للناس والبيوت.

همس الوسواس لصادق:

- يا ترى حسام واخذك على فين يا صادق؟

صادق أحس أن هناك صوتا يحدث عقله، ملامحه بدأت في التغيير والخوف عليه والتوتر زاد، يمسك رأسه، يلاحظ حسام التغيير المفاجئ له فأمسك بيده قائلاً:

- مالك يا صادق؟

- حاسس في صوت بيكلمني..

قال حسام ضاحكاً:

- معلىش يا حبيبي مش قولتلك..

رد صادق غاضباً:

- مستحيل أخلي أي حاجة تسيطر عليا، اه يا دماغي!

مازال الاثنان يسيران حتى وصلا إلى ساحة الفسق والفجور، يشاهد صادق الساحة كأنه أول مرة يشاهدها رغم وصوله لها في بداية دخوله الحارة. همس الوسواس:

- إيه البنات الحلوة دي متعريين كدا أف بقا!

يوسوس لصديق من جديد وينظر إلى النساء العراة، الشهوة تقتله، ترك حسام ويسير ناحيتهن ويبلع ريقه واندفعت عليه إحداهن، أمسكت به، قبل دخولهم البيت قام بدفعها بعيداً ويصرخ:

- حرام.. حرام.. مش هعمل كدا.. ابعدي عني.. دماغي يا حسام!

حسام أمسك به وقال:

- مالك يابني حصلك إيه؟!!

- يطلع من دماغي! مش هزني مستحيل!

- لازم يا صادق، اسمع، ازني، مش هينفع، برا الحارة ليك حرية الاختيار أما جواها لازم تنفذ وسوسته.

رد صادق غاضبا:

- لا لا مستحيل روحي مش عايز أخرج..

- خلاص اهدا هروحك.

أسنده حسام حتى وصلا إلى بيت عم فتحي وأراحه على الأرض ويردد:

- أنا مش هنفذ كلامك اطلع من دماغي.

عم فتحي ينظر له ويقول:

- ماله يا حسام؟

- فجأة كان رايح ناحية البنات لسه هيزني معاهم رجع ويصرخ جامد وزي ما انت شايف.

- لا مفر يابني لازم تنفذ وسوسته عشان تعيش..

- مستحيل قولت أنا أخرج منها أو أموت..

- يابني متنشفش دماغك لازم تعمل كدا..

قال صادق غاضبا:

- سيبوني! امشي من قدامي يا حسام روح انت!

عم فتحي طلب من حسام تركه والخروج للبحث عن عمل سيئ لكي يرضي وسوسته، يسير ويفكر: "ليه يا صادق دخلت عشاني، كنت خليك برا أحسن، أنا هموت من التفكير "

وجد جورج واقفا مع بعض الرجال قرب بيته فنادى عليه:

- جورج تعالى!

جاء مسرعا له قائلا:

- ازيك يا حسام أخبارك إيه؟

- كويس المهم في سؤال محيرني ممكن أسألك فيه؟

- انفضل قول..

- انت لما نزلت لمرحلة الوسوسة الثانية حصلك إيه؟

- الحقيقة ضعفت.. خوفت.. لأنك بتبقا تحت ضغط.. تاخذ فرصة يوم إنك تقتل فيه أو تحرض على القتل وإلا تنزل في وسوسة الموت ويا ترى هتقدر أو على حظك يجيلك وسوسة للقتل أو التحريض عليها لأنك مهما زانيت وشربت ولا كأنك بتعمل حاجة، لو جه عليك الليل ومعملتش أذى تصحى تلاقي نفسك في وسوسة الموت ودي صعب وصفها.

- محدش بينجى منها نهائي؟

- لا فرصة واحدة بس للنجاة منها..

- هي إيه قول بسرة؟

- يوم القصر الأسود..

-مش فاهم!

- يوم بببقا عادة السبت بيتجمع فيه أهل الحارة قدام الأرض الفاضية اللي في آخرها بيظهر القصر، بيحصل فيه صياح جامد جواه وأصوات غريبة مش مفهومة وتميل بجسمك بس مش بالكامل تغمض عينيك تفتحها تلاقي قدامك مشروب دم بس من غير خمرة.

يخرج زفيرا ويكمل:

- بعدها تشرب الدم تتحول لشخص تاني متفهمش انت بتعمل إيه والغريب لما تفوق بتلاقي نفسك عريان تماما من الهدوم، فرصة النجاة بتيجي ازاي بقاء، ودي محصلتش غير لواحد في الحارة هو الساحر خاضع، أهل الحارة اللي بيقولوا كدا، وإن وسوسة الموت على حظك تجيلك يوم السبت بنتعفي عشان الاحتفال باليوم القصر الأسود نهائي بتعيش من غير مراحل للشيطان بس دي صعبة جدا عشان هو مش بيدى الفرصة لأي حد.

قال حسام متعجبا من حديث جورج:

- هو النهاردة إيه

- الأربعاء

- بتعرفوا الأيام منين!

- من يوم القصر الأسود عشان معروف هنا ببيقا السبت بنبدأ نعد الأيام من بعده أما الساعة من الشروق والغروب.

الحيرة على حسام قد تقتله خوفا على صادق الذي عاند وسوسته، يطرق على أحد البيوت بيده غاضبا مما يحدث.

- مالك يا حسام؟

- مليش

- تعالى معايا نروح أشربك حاجة هتتسيك الحارة كلها.

ذهب الاثنان معا ناحية ساحة المحلات، دخل جورج وترك حسام بالخارج عند محل المخدرات وأتى له بحبة سوداء اللون كبيرة الحجم، تعجب حسام قائلا:

- إيه الحباية الغربية دا يا صاحبي؟!

رد جورج ضاحكا:

- حباية القضاء الأسود تاخدها من هنا توصل لمرحلة غريبة، تلاقى نفسك برا العالم والحارة دي، بس مشكلتها في حاجة بتوصلك لدرجة من الهلوسة تخليك غير مؤمن سوى بالشيطان.

ظهر الخوف والارتباك على حسام بعد سماعه جملة غير مؤمن سوى بالشيطان، يأخذ أنفاسه وقال:

- انت جربتھا؟
- اه والحقیقة حبیب رحلتھا أوی، تجرب؟
- هات بس مش هجرب دلوقتی..
- براحتك، انت ناوی تعمل إیہ النهاردة؟
- مش عارف بس الأكید یووو لسه بفكر.
- خلاص اسیبك أنا عشان فی حوار كدا أبقا أشوفك فی وقت تانی.
- حسام ظل فی الحارة حائرا ماذا یفعل، یرى تجمعات من الرجال مع بعضهم وینظرون له ویسخرون منه والغضب یزداد علیه أكثر من أي وقت مضى فی الحارة له وفجأة دخل فی وسط مجموعة منهم ویقول:
- انتو بتضحكوا علی إیہ؟
- رد أحد الرجال:
- وانت مالك بنضحك علی إیہ براحتنا!
- رد حسام غاضبا:
- لا انتو بتضحكوا علیا!
- حتی لو بنضحك علیك فیها حاجة؟

حسام ينظر إليه والشر في عينيه واندفع إليه ضربا وأمسكه بعض الرجال الواقفين معهم وتعدوا بالضرب على حسام بقوة مفرطة حتى أفقدوه الوعي ملقى على الأرض.

يجلس الدكتور شوقي مع فايز وخيرية وهما يبكيان على اختفاء ابنهما وابن عمه صادق في دار الحاج شلبي ويقول:

- هما بقالهم اربعة أيام مش موجودين صح؟

رد فايز:

- اه يا شوقي أنا حاسس إن ابني جرا ليه حاجة..

سأل شوقي: طب البوليس عمل إيه؟

- ولا حاجة بيدوروا، وأخويا بقاله يومين برا البيت بيدور مع الرجالة.

- إن شاء الله خير..

- أنا خايف جدا.. في حاجة معينة يا شوقي.. أصل كان فترة بيختفي حد من أهل القرية ومحدث بيعرف عنه أي خبر ويتفاجئوا انه دخل منطقة غربية كدا..

رد شوقي متعجبا:

- منطقة إيه؟

- حارة هنا في القرية اسمها حارة الوسواس.

تظهر الصدمة على شوقي ويقول في سره:

- حارة الوسواس!

"القصر.. اللعنة يا حسام.. القصر.. اللعنة يا حسام" ضحكات عالية في أذنيه، ينتفض من نومه وعلامات الضرب على وجهه، ينظر، الليل قد حل على الحارة، خالية من أهلها، إنهم يجلسون في بيوتهم للطعام والنوم، والخوف عليه، ماذا يفعل؟ الرؤية غير واضحة أمامه حتى يستطيع أن يصل إلى بيت عم فتحي وأثناء مروره سمع صوت يهمس من الحارة: "حسام.. حسام" ويضحك بصوت عال يلتفت حوله حتى يعرف مصدر الصوت، لم يجد أي شخص، يعود الصوت: "القصر.. القصر.. اللعنة يا حسام" ويضحك: "خلي بالك انت كذا خلاص هتموت في الحارة" وفجأة ظهر أمامه شخص غير واضح الملامح في الظلام، وقف في مكانه يخرج زفيراً، الشخص يقترب من حسام حتى رفع وجهه.. ظهرت أمامه شيزارا ضاحكة:

- ازيك يا حسام؟

-عايزة مني إيه؟

- أنا أفضل أعوز منك لغاية ما تموت..

- انتي عايزة تموتيني ليه

- أنا هنا اللي بموت، أنا صوت الصياح، فاكّر الصوت اللي حصل في البيت؟ أنا وقتها بكون هناك أعرف إن حد هيموت وهيختفي منه متقولش ازاى.

وتضحك بسخرية وتكمل:

- عشان أنا عارفة اللي انت بتفكر فيه دلوقتى.

رد حسام خائفا:

- طب ابعدي عني وسيبيني مش عايز أموت.

ردت شيزارا ضاحكة:

- هتموت.. مدام انت موجود هنا عابد ليه، مغضوب عليك، انت هتموت يا حسام.

حسام يسمع الكلمات ويجري في الحارة في الظلام ولا يرى أمامه شيئا وهي صوتها يعلو:

- هتموت يا حسام، مش هسيبك، هيجي دورك.

يجري بقوة، لا يستطيع أخذ أنفاسه من شدة الركض ويفكر: "أروح ازاي عند عم فتحي في الضلمه دي مش شايف حاجة".

يتنهد ويضع يده على ركبتيه، وجد أمامه دماء على الأرض، يتحسسها حتى يتأكد، رائحتها دخلت أنفه، يحدق عينيه، يسير معها حتى وصل إلى الأرض الفارغة، تعرف عليها من تجاعيد رمالها، اطمأن قلبه لأنه علم أن هنا يتواجد منزل عم فتحي، لكنه تفاجأ بوجود شيء ما تحت رجليه، ينزل برأسه ليرى، أتى نور ضعيف ناحيته، ينظر ليجد جثة المرأة التي تعدى عليها وسرقها، توقفت الدماء عن السريان في جسده ثم سمع صوتا:

- يا عيني شوفت قتلت الست ازاي يا حسام ليه كذا!

- أنا مقاتلتش حد!

-لا قتلتها اهو وسرقتها ليه حرام عليك!

صرخ حسام بصوت عال:

- ياعم فتحي.. ياعم فتحي! حد يساعدني!

يندفع ناحية الأرض ويجري والخوف عليه، أصبح في روجه، أحس بعدم اتزان من شدة التعب وضربات قلبه كادت أن تتوقف، أحس بأنفه تنزف بغزارة، شيزارا أمامه واقفة بوجهها المشوه الشيطاني الذي تقطر منه الدماء، قال حسام غير مصدق ما يحدث:

- عايزة مني إيه ابعدني عني!

ردت شيزارا بصوت متحول شيطاني:

- انت في حارتي يا حسام.. انت اللي عايز..

-أنا عايز أخرج مش عايز أفضل هنا!

ردت شيزارا ضاحكة:

- تخرج! لازم تحاربني ولو قدرت عليا تخرج يا حسام.

أنفه مازالت تنزف، لا يستطيع الحديث، وشيزارا واقفة أمامه بمنظرها المرعب قائلة:

- أنا لعنة عليك، مش هسيبك غير وانت ملحد يا حسام، سامعني؟ فاهم كلامي كويس؟

حسام رأسه تتحرك يمينا ويسارا حتى سقط مغشيا عليه.

جلس صادق بجانب حسام على الأرض ومعه عم فتحي وحاولا إيقاظه حتى فتح عينيه وقال:

- سيبيني.. بقولك أهو مش هلحد عايز أعيش مش عايز أموت!

قال صادق مساعدا حسام على النهوض:

- مالك يابني مجيتش ليه امبارح؟

- مافيش حاجة أنا كويس..

- حصلك إيه؟ اتأخرت وخليت الليل بييجي عليك ليه يا حسام وأنا محذرك؟

قال صادق:

- أنا قولت لعم فتحي يسيبني أخرجلك مرضيش قالي ممنوع تخرج في الليل.

حسام يتحسس وجهه وأنفه من الدماء، لم يجد شيئا، سرح بعقله: "مافيش دم ولا حتى على الأرض!".

وقف مسرعا ودار بجسده فلم يجد جثة المرأة، يحدق عينيه قائلا:

- عم فتحي انت سمعت عن ست في الحارة اسمها شيزار؟

رد عم فتحي متعجبا:

- لا يا حسام مافيش حد اسمه كدا في الحارة!

- انت متأكد يا عم فتحي من كلامك؟

- أيوة ليه يعني؟

- خلاص مش مهم..

سار الثلاثة داخل ساحة الحارة، سعد عم فتحي لبيته كالعادة الذي لم يخرج منه واستكمل حسام وصادق الطريق في الحارة، يسأله صادق:

- غريب يا ولد العم المكان عادي أهو!

- ليه الاستغراب؟

- أصل طول عمرهم بيحذرونا منها أنا جواها أهو، مالها بقا ناس عادية زينا!

قال حسام مقاطعا:

- لا مش عادية دي ناس ناسية ربنا وخاضعة لكلام وسوسته الشيطانية وأفعاله، كل واحد في الحارة ليه حكاية ازاي دخل دي بقا اللغز!

- يوه يوه يا ولد أبوي أنا مخي تخين فهمني براحة!

- أنا أفهمك، من يوم ما جيت وأنا كل يوم بكتشف حاجة جديدة في الحارة، طريقة لبسهم والبيوت المرقمة ومن الخشب، الأرض البور، الشمس اللى عمرها ما تدخلها، والأصعب حكاية القصر اللي بيظهر يوم السبت بس ناحية الأرض!

قال صادق ضاحكا:

- والله يا شيخ ما فاهم حاجة!

- مش مشكلة المهم إنك لازم تعمل زي ما عمل عشان أنا خايف عليك..

- رجعنا للكلام الماسخ! مش هسمع كلام الشيطان! مستحيل أنا مكلتش امبارح وصاحي تعبان ومش قادر أمشي!

قال حسام غاضبا:

- اه نسيت انت النهاردة في المرحلة الثانية يعني لازم تقتل! الكلام خدنا نسيت!

- أقتل إيه مش فاهم!

- انت في المرحلة الثانية من الوسوسة، كدا هتموت يا صادق، لازم تقتل أو تحرض على القتل هنعمل إيه؟

صادق غير مصدق حديث حسام ويصرخ عند اقترابه من ساحة المحلات:

- أنا لازم أخرج من الحارة الشيطانية دي! سامعيني؟ أخرج مش أعمل زيكم!

حسام أمسكه وبيعه حتى لا يشتبك مع أحد لكن المفاجأة تجمع عدد من الرجال حول الاثنين ويضحكون ويقول أحدهم:

- عمرك ما تخرج واحنا عاجبنا حياتنا آخرك هتموت وهنشرب دمك.

رد صادق بغضب:

- أخرج غصب عنك ولا أخاف من الموت!

- يلا نمشي من هنا يا صادق تعالى..

- اه يا دماغي مش قادر أقف يا حسام! الحقني يا ابن عمي..

ثم سقط مغشيا عليه.

حسام يصرخ:

- صادق.. صادق!

أسنده مع تواجد جورج الذي حمله معه وأسرعوا به إلى بيت عم فتحي، أدخلوه وأراحوه على الأرض.

- ابن عمك يا حسام هيموت نفسه، هو مش عارف انه كدا بقا في المرحلة الثانية؟

قال جورج مت دخلا في سير الحوار:

- لا كمان ركب دماغه مع الوسوسة في أخطر المراحل بيقا كدا خلاص نزل إلى وسوسة الموت هيفضل مش متزن لغاية موته اللي هو امتا محدش عارف.

قاطع حسام غاضبا:

- لا اتصرفوا لازم يعيش لغاية ما نتصرف ونخرج، لازم تفوق،
اسمعي يا ابن عمي لازم تعيش..

- مافيش حل خلاص سيبه وروح انت شوف هتعمل إيه..

أمسك جورج بحسام وخرجا سويا للحارة وكان أهلها قد تجمعوا
بالخارج ينظرون ويتحدثون عما حدث حتى سمع حسام صوت أنثى
تنادى عليه:

- حسام.. حسام!

استدار حسام ليجدها غرام تقول:

- رايح فين؟

-أنا رايح اه يا دماغي مش قادر أفكر!

- تعالى معايا عايزاك..

ترك جورج حسام بعد أن قال له إنه منتظره في ساحة المحلات وسحبته
غرام من يده ناحية الأرض البور واقفا قبلها بمترين قائلة:

- أنا حاسة بيك عشان كدا هساعدك..

- بجد هتساعديني يعني في حل؟

- عايز تخرج من الحارة دي أول حاجة لازم تحارب لعنتها.

- أنا عارف بس أحاربها ازاي وهو أصلا مسيطر عليا!

- أقولك على سر، المكان اللي احنا فيه دا موجود بير جواه مياه طبيعية، لو قدرت توصله هتسقي الأرض هتنزرع أكل طبيعي من عند الله الناس هتاكله، بكدا اللعنة تتفك من على الحارة ويبقا ضمنت الخروج لينا كلنا.

رد حسام ضاحكا:

- طب ليه محدش فكر في إنه يوصل للبير دا؟!!

- يابني دا سيطر بوسوسته على روحهم من جواها تايهين بين الزنا والخمرة والمخدرات!

- مافيش حل ثاني يا غرام؟

- اسمع الكلام، الحل في البير، غير كدا مستحيل اللعنة تتفك، ادعي لابن عمك عشان هيموت..

قال حسام محققا عينيه والغضب عليه:

- متقوليش كدا مش هيموت أنا أعمل أي وسوسة يقولها ليا بس مش يموته!

غرام هزت رأسها وتركت حسام يحدث نفسه ويردد في سره: "ميموتش" ويكي حتى جاء الوسواس في عقله يقول:

- مش عايزه يموت بس خلاص مفيش حاجة في إيدك تعملها، متأنبش ضميرك.

- قولي بس في أي طريقة وأنا أعمل اللي انت عايزه..

- زنيـت وسرقت ناقص مخدرات معتقدش إنك هتقدر عليها.

- بس هو لازم يعيش ملوش ذنب.

- قدامك حل واحد.

فجأة ظهرت أمامه شيزارا بشكلها المخيف قائلة:

- عايز صادق يعيش؟ الحد يا حسام، متفكرش في ربنا، خليك زي اللي عايشين، شايف عايشين ازاي؟

- أنا بنفذ كل حاجة بتوسوس بيها عايزة إيه تاني مني!

- لا بس دايمـا فاكـره وضميرك بيأنب فيك، عايزك تنساه نهائي، الناس برا الحارة بيعملوا اللي أهلها بيعملوه هنا بس مؤمنين بيه.

قال حسام غاضباً:

- سيبيني أنا مش هلحد وربنا هيقف معايا وأخرج من الحارة دي سامعني؟

شيزارا الدم ينزل من وجهها من جديد، يرجع خطوتين للخلف وصوتها يتحول:

- أنا الحاكم في الحارة ومش هسيبك وهيموت يا حسام وانت كمان هموتك كلـم تحت طاعتي أنا.

يجري حسام داخل الحارة الجميع متعجبه حتى صدم رجل قوي البنية، وقع على الأرض، ينظر إليه، تعجب من حجمه، لم يجد أحدا من أهل الحارة الجميع اختفى، يقترب منه الشخص ويحمله على كتفه ويضربه ضربا قويا ويدفعه على أحد البيوت، ينزل حسام على الأرض فيتوجع من قوة الضربة ولا يستطيع أن يحرك جسده، يرفع رأسه فلم يجد أي شخص ينجيه من ذلك المتوحش، فجأة سمع أصوات أهل الحارة في أذنيه، التعجب على ملامحه يفكر: "أنا بحلم ولا إيه كأن مافيش حاجة حصلت جه منين ابن الكلب دا جسمي كله واجعني".

وجد شخصا واقفا أمام بيت رقم خمسة عشر فذهب ناحيته قائلا:

- انت مأشوفتش اللي حصلتي دلوقتي؟

رد الرجل:

- انت مجنون يا أخ شوف انت رايح فين!

- هو البيت ده بتاعك عايش فيه لوحدك؟

- مش هحدرك تاني ابعده عن طريقتي!

- عادي أنا بسأل..

الرجل يحدق بعينه ويقول:

- ابعده عني هأذيك..

جورج جاء من خلف حسام وسحبه من يده وسار به ويقول:

- أنا كل شوية أجيبك من مشكلة!
- أنا بتكلم معاه عادي بسأله مش قصدي حاجة!
- ملقتش غير ده وتسأله!
- ليه ماله يعني؟
- دا اسمه "خاضع" مشهور بالسحر ابعده عنه.
- ياه هي الحارة كمان فيها سحرة طب دورهم إيه؟
- دورهم في المرحلة الثانية زي ما انت عارف بس محدش عارف
الراجل دا دخل ازاي وجه منين الحارة هو وعم فتحي!
- مش فاهم!
- عم فتحي مش بيخرج من البيت وبيبقا دايمًا في المرحلة الأولى ومعاه
كمان بنته عايشين ازاي الله أعلم، ممكن الساحر بيفضل بفضل سحره
وعمله المؤذي دايمًا، وراهم الاتنين سر كبير!
- في حد ثاني غيرهم؟
- لا بص كل بيت عايش فيه على الأقل خمس رجالة والبنات كلها
عايشين في ثلاث بيوت في الساحة عشان الزنا، ممنوع يجتمعوا في
بيت واحد، غير عم فتحي وبنته..
- يصمت دقيقة ويكمل:

- كل واحد ليه حكاية دخل بيها، في اللي بيحكي وفي اللي مش بيرضى يحكي، احسب معايا، عدد العايشين مش هيعدي المية، والغريب أكثر لما حد يموت لازم حد يخش مكانه بعدها.

- اه فهمت..

- دي اسمها قواعد الحارة الوسواس.

انتهى جورج من تلك الجملة وسار معه حسام ناحية ساحة المحلات، وقف ينظر ناحية النساء الواقفات على أبواب بيوتهن عاريات الصدر فلاحظ غرام معهن، استأذن من جورج وذهب إليها مسرعا ويقول:

- واقفة بتعملي إيه هنا؟

- عادي واقفة معاهم..

- إيه دا انتي زيهم؟

ردت غرام غاضبة:

- انت حيوان وأنا مش زي حد!

- طب واقفة ليه؟!

- متسألش شوف انت بتعمل إيه!

الإحراج على حسام بعد رد فعلها الغاضب فأمسك يدها واعتذر لها بعد تقديم عقله له مبررات سلبية وسار معها في الحارة ويقول:

- عايز أسألك سؤال..

- اتفضل بس ياريت ميعصبنيش..

- انتي دخلتي الحارة ازاي؟

غرام صمتت دقائق وحسام ينتظر ردها على سؤاله حتى قالت:

- الحقيقة أنا معرفش دخلت ازاي الحارة أنا دخلتها كنت في سن عشر سنين يعني أحسن واحد يرد عليك على سؤالك هو أبويا.

- اه تمام أبقا أسأله..

وصل حسام مع غرام إلى البيت واطمأن على صادق الراقد على الأرض منتظر وقت موته القلق على ملامح حسام لا يملك حلا لإنقاذه وتبقى أربعة أيام على يوم القصر الأسود، وخرج إلى الحارة ظل يشرب الخمر حتى غاب عقله سريعا، حل الليل وبدأ أهل الحارة في الاختباء، يسير حسام حتى وصل إلى بيت عم فتحي وهو تائه بسبب الخمر التي أكلت خلايا تركيزه فوجد صادق مستيقظا لكنه لم يقدر على التحرك ويقول ضاحكا:

- أنا قولتلك اشرب واعصى وازني عشان تعيش..

صادق ينظر لحسام والتعب عليه ويقول:

- مالك يا ابن العم مش على بعضك ليه؟

- لا لا لا أنا كويس أوي انت بس اللي غبي..

- خلاص الوقت فات يا حسام افنكر إن لو مت ربنا راضي عني ومعملتش حاجة غلط..

رد حسام ضاحكا:

- راضي عنك ازاي وانت أصلا جوا مكان هو مش راضي عنه!

- احنا عايشين برا الحارة زي جوا، الناس دي بالظبط عندنا في القرية، اللي بيزني وبيشرب مخدرات وخمرة زي أهل الحارة الملعونة دي، بيقا أنا لو مت في القرية ربنا مش راضي عني؟ يا خسارة يا حسام، رحنت ومرجعتش، بس افكر إن أنا كنت بحبك..

وأثناء حديثهما أحس حسام أنه لا يستطيع أن يأخذ نفسه بصورة طبيعية، هناك شيء يخنقه، ظل يمسك برقبته اختناقا وقع على الأرض يفرك بجسده ويخرج لسانه لم يقدر على أخذ أنفاسه وأثناء تلك الأزمة المفاجئة سمع صوت الصياح شديد وعال في البيت، لا يوجد هواء فيه، يرفع عينيه وجد شيزارا أمامه واقفة وتضحك:

- خلاص يا حسام راح ومش هتقدر تعمل حاجة ليه.

يمد يده وجدها شبعا لم يستطع أن يقف، صادق ينتفض من مجلسه ويهز جسمه وروحه تخرج منه أمام أعين حسام الذي يحدق لم يصدق ما يشاهده ويقول بصوت مختنق:

- صادق.. صادق!

جسد صادق يرتفع إلى أعلى من الأرض وصوت الصياح يزداد بشدة وشيزارا واقفه تضحك:

- يا حسام مات خلاص بصلي وركز معايا..

ينظر لها حسام وجدها تمسك بجسد صادق وتعتصر دماءه وتمزقه أمامه وتخرج الدماء منه وتشربها، حسام لم يقدر على تحريك جسده، صوت الصياح ملاً أروقة البيت، مات صادق واختفت جثته وشيزارا لم تعد لها وجود، حسام فقد الوعي على الأرض راقداً.

اليوم الخامس في حارة الوسواس، حسام راقد على الأرض نائم، صوت أنفاسه العالي بين أروقة البيت، حتى خرج عم فتحي ليوقظه ويوجه يده على ظهره لأن حسام نائم علي بطنه ويقول:

- حسام جه ميعاد الصحيان..

يفتح عينه حسام ويقول:

- صادق مات يا عم فتحي..

ارتعش جسد فتحي بعد سماع هذه الجملة وينظر بطرف عينه حول المكان، بالفعل لم يجد صادقاً راقداً بجانب حسام وبالفعل سمع صوت الصياح في البيت أمس لكنه لم يتوقع أنه سيموت بهذه السرعة وتختفي جثته، يفرك بيده قائلاً:

- قوم يابني معلش نصيبه هو اللي نشف دماغه، لا مفر من قواعد الحارة..

انتفض حسام ويبكي بصوت عال:

- سامعني أنا مش هسيب حق صادق ومش هسمع كلامك تاني وهخرج من الحارة..

ويزداد البكاء ويكمل:

- سامعاني يا شيزارا؟ مش هلحد، اه.. صادق هيرجع!
يمسكه عم فتحي ويحاول أن يسيطر على حالة الغضب التي انتابته
ويقول:

- اهدا يا حسام.. دا واقع وكنت لازم تعيشه.

رد حسام باكيا:

- مش قادر أصدق إنه مات وانت متعرفش كان بالنسبة ليا إيه.

قال عم فتحي مواسيا:

- قواعد مفيش منها هروب أسسها الشيطان تنفذ تعيش متنفذش تموت..

- خلاص يا عم فتحي مش هنفذ أنا عايز أموت.

قال عم فتحي غاضبا:

- هتموت زيه هتستفاد إيه لازم تنفذ!

خرجت غرام على صوت أبيها وتدخلت في سير الحوار قائلة:

- في إيه يا بابا صوتكم عالي ليه؟

- صادق مات وراح يا غرام..

الصدمة على غرام وتتنظر بعينها في جوانب البيت هي الأخرى كأنها لم
تصدق حديث حسام وتقول:

- مات يا حرام!

- أنا بحدرك عشان تعيش لازم متخالفش قواعد الوسوسة وإلا هتحصل صادق!

تركهم حسام مسرعا للخارج ويجري ناحية الأرض وجلس هناك والدموع على جبينه وجاءت خلفه غرام دخلت عليه قائلة:

- حسام أنا قولتلك قبل كدا عشان تطلع منها لازم تحارب اللعنة وتدور على البيير، او عى تستسلم ليهم.

رد حسام باكيا:

- أنا خلاص مش هدور على البيير الموت أرحم من العيشة في الحارة.

- أرجوك يا حسام او عى تستسلم او عى!

- متحاوليش يا غرام أنا خلاص هدخل البيت مش هخرج منه غير وأنا ميت وهروح لصادق ومن اليوم ولا أكل أكله ولا أخضع لوسوسته.

ترك حسام غرام واتجه ناحية البيت وظل جالسا طوال اليوم والدموع لم تفارقه حزنا على ابن عمه وكالعادة غرام وعم فتحي جالسان بغرفتهما لم يخرجوا ولا أحد يسمع لهما صوت، بالداخل لم يفعل حسام ما يشفع له البقاء في المرحلة الأولى، راقدا بجانب أحد الحوائط يبكي بشدة وفجأة سمع صياحا ليلا بأحد البيوت المجاورة، قلبه انتفض دقائقه تعالت ويحرق بعينه وجد شيزارا أمامه مثل الشبح المتخفي، وقف من مجلسه وينظر إليها فلم يجدها، اختفت، قطة سوداء اللون تخرج صوتا يشبه الصياح خفي حسام بالحائط يرتعش جسده من الخوف ويقول:

- أنا مش خايف منك!

اليوم السادس في حارة الوسواس، استيقظ كالعادة أهل الحارة ليمارسوا الفسق الشيطاني ليحصلوا على قليل من الطعام. حسام نائم في بيت عم فتحي غير دارٍ بما يحدث حوله، دخلت غرام عليه لتوقظه من نومه قائلة:

- حسام.. حسام..

لم يرده عليها بأي رد فعل إيجابي، كررت من جديد نداءها وهي تمسك يده:

- اصحا.. حسام يلا فوق كدا.

فتح عينه حسام لم يقدر على تحريك شفثيه لينطق يحرك يده وبنفس ضيق وصوت منخفض يقول:

- عايز أموت يا غرام.. سيبيني مش عايز أعيش في الحارة تاني.

غرام تقترب بأذنيها لكي تسمع حدقت بعينها بعد فهم حديثه المنخفض قائلة:

- مالك يا حسام شكلك تعبان أوي؟

وتعلو بصوتها منادية:

- بابا.. الحقني!

خرج عم فتحي من غرفته مسرعا وجد غرام تمسك بحسام تسنده فيقول:

- في إيه يا حبيبتي حسام ماله؟

- شكله تعبان أوي!

رد عم فتحي غاضبا:

- أنا قولتله لازم يفوق هو في المرحلة الثانية وعاند، الوسوسة لازم يكون عاجز عن الحركة عشان ينزل للموت وميقدرش ينجى منه!

قالت غرام خائفة:

- طب نتصرف ازاي معاه يا بابا هو هيفضل على الحال دا لغاية ما يموت؟

يصمت عم فتحي لدقيقة بعدها يقول:

- مفيش حل غير إننا نروح نجيب ليه خاضع الساحر هو أكيد عنده حل لحسام..

سمعت غرام تلك الجملة وذهبت بأقصى سرعة لها لكي تأتي بخاضع ليرى ماذا يفعل لحسام مرت خمس دقائق فقط ودخلت غرام بخاضع مسحوبا بيده قائلة:

- أهو يا بابا خاضع جه!

- ازيك يا خاضع معلش بنتي جبتك على ملا وشك..

- اتفضل عندك مشكلة إيه؟

- تعرف الشخص النائم ده؟

خاضع ينظر للشخص ليرى ما الذي يقصده فتحي قائلا:

- أيوة أعرفه ده حسام.

الدهشة على عم فتحي وغرام بصوت واحد:

- تعرفه منين؟

رد خاضع ضاحكا:

- متخافوش كدا أنا مشوفتهوش غير مرة واحدة كان بيستظرف عليا وأنا واقف عند البيت وجه صاحبه خده وقاله يا حسام وأنا عرفت اسمه من الموقف.

شرح عم فتحي بعدها لخاضع بداية دخول حسام الحارة حتى هذه اللحظة حتى قال آخر جملة:

- ممكن نقدر ننقذه من اللي هو فيه؟

ظل خاضع يفكر عدة دقائق حتى قال:

- الحقيقة يا عم فتحي أنا محتار، العناد مع قواعد الوسوسة بيترتب عليه الموت زي ما انت عارف، أنا ممكن أخدمه في السحر أأذي ليه شخص كأنه هو اللي طلب وده شغلي بس في حاجة لما يفوق هيرجع تاني لنفس الحالة عشان مش هينفذ وسوسته يبقى الوضع كما هو عليه.

- عندك حق يا خاضع انت دورك أذى بس وبعدها هيرجع تاني، أنا احترت معاه دماغه ناشفة زي ابن عمه قبل ما يموت!

قالت غرام متدخلّة في سير الحوار:

- يعني خلاص كدا هيموت يا بابا؟
- شكرا يا خاضع وأنا هبقا اقعد معاك مع السلامة..
- انصرف خاضع وحسام مازال راقدا لا يقدر على تحريك جسده للوقوف
ينظر فتحى لغرام التي تجلس بجانبه والحيرة في عينه قائلا:
- مالك يا غرام خايفة عليه بطريقة ملفتة؟
- عادي يا بابا مفيش حاجة بس صعبان عليا مش أكثر..
- مش مصدق انتي اتعلقتي بيه!
- غرام تحدق بعينها:
- لا لا اتعلق بمين! ممكن اتعودت عليه..
- خلاص قومي من جنبه سيبه لغاية ما نشوف هيحصل معاه إيه!
- قامت غرام بالدخول إلى غرفتها قبل أن يدخل عم فتحى معها سمع
صوتا يقول:
- حسام.. حسام!
- استدار بجسده ونظر ناحية الباب فوجد جورج واقفا فسمح له بالدخول
وقال جورج:
- ازيك ياعم فتحى هو حسام فين؟

وضح مرة أخرى عم فتحي لجورج الحالة الذي عليها حسام الصدمة
تملكت من جورج الذي وضع يديه على رأسه وجلس بجانبه وطلب من
عم فتحي أن يتركهما سويا ودخل الغرفة.

- هتسيبيني يا صاحبي؟ أنا قولتلك متعاندش معاه محدش قادر عليه في
الحارة.. ليه وصلت نفسك لكدا؟ ابن عمك اختار طريقه، ليه يا حسام أنا
ما صدقت حد كويس دخل الحارة، عشت معاك أيام بس بجد هونت عليا
العيشه في الحارة..

فتح حسام عينيه مع حديث جورج ويقول:

- جورج متزعلش مني بس أنا مينفعلش أعيش بعد أما شوفت صادق
قتلته قدامي شيزارا!

رد جورج غاضبا:

- محدش موجود في الحارة بالاسم ده يا حسام فوق بقا!

- موجودة وهي كمان سبب اللعنة على الحارة هي قالت ليا الكلام دا
صدقني!

- طب ريحني واسمعني خاضح الساحر الوحيد اللي يقدر ينقذك
هيساعدك بس متنشفش دماغك تاني..

- مستحيل أسمع كلامه تاني مش هأذي حد ولا هقتل حد لو حد يستاهل
يموت بيقا أنا، فاهمني يا صاحبي؟ أنا أنا أنا!

- خلاص أنا تعبت معاك انت من بكرة هتبقا في وسوسة الموت يا حسام
انت غاوى تفارقني، سلام يا صاحبي، بكرة أعدي عليك..

ترك جورج حسام وهو مسندا على الحائط بظهره يفكر بما سيحدث له من غد عند وصوله لمرحلة وسوسة الموت، مر اليوم وحسام حائر حيرة موتية لا نجاة فيها.

اليوم السابع في حارة الوسواس، يوم وصول حسام لوسوسة الموت، كان نائما في البيت مفتوح عيناه لم يقدر على تحريك أي من أعضاء جسده، نفس خارج فقط، دقات قلبه ترن، جالسة بجانبه غرام وتنتظر إليه والحيرة أفجعته تفكر: "أعملك إيه أنا يا حسام مش عايزاك تفارقني! غريبة عمري ما اتعلقت بحد من الحارة بس انت من أول ما شوفتك وأنا حسيت إني عايزة أبقا جنبك على طول! كان نفسي تعيش وتحارب اللعنة ونخرج سوا ونكمل حياتنا برا الحارة.. يا ترى انت سامعني..

دخل عليها عم فتحي قائلا:

- خلاص يا بنتي هو اختار طريق الموت..

ردت غرام باكية:

- صعب أوي عليه فراق ابن عمه يا بابا..

- قومي يا بنتي عشان النهاردة يوم القصر الأسود، اجهزي كمان ساعة وهنخرج.

نظرت غرام نظرة يملؤها الياس لأبيها وظلت جالسة بجانب حسام حتى سمعت صوت طرق الباب وصوت جورج، فتحت له فدخل واندفع ناحية حسام ويقول:

- خلاص نزل لوسوسة الموت؟ ليه يا حسام!

- مفيش أمل خلاص يا جورج النهاردة ممكن يكون آخر يوم ليه معانا..

رد جورج باكيا:

- أنا مش قادر أصدق بجد حبيته أوي في فترة صغيرة حرام يموت
ومش بايدي أعمله حاجة!

- معلش يا جورج هو اللي اختار.. المهم انت جاهز ليوم القصر
النهاردة؟

رد جورج محدقا عينيه ويضحك بهيستيرية:

- انتي قولتي إن النهاردة يوم القصر الأسود بجد؟

ويقف وقفز فرحا على الأرض:

- حسام هيعيش.. حسام هيعيش!

قالت غرام متعجبة من ردة فعله:

- فهمني يا جورج قصدك إيه؟!

- مش أي شخص يوصل لوسوسة الموت ويبجي يومه في نفس يوم
القصر الأسود بيتعفي في الحفلة؟

- اه صح ازاي مجاتش في بالي من الصبح!

ثم نادت:

- يا بابا يا بابا!

خرج مسرعا من الداخل وقال:

- خير في حاجة يا غرام؟

ردت غرام والسعادة في ملامحها:

- حسام مش هيموت حيعيش!

- ازاي يا بنتى فهموني!

- النهاردة يوم القصر الأسود هيتعفي من الموت، مش دي القواعد اللي عارفينها؟ انت شكلك نسيت زيي.

ظل يفكر عم فتحي في حديث غرام لمدة دقيقة ثم قال:

- أها افتكرت بس انتو عارفين لما هيتعفي بيحصله إيه؟

نظر الاثنان لعم فتحي وبصوت واحد:

- إيه؟

- ببيقا خاضع ليهم، واحد منهم، بياخد مرتبة عالية عندهم زي خاضع الساحر.

الصدمة عليهما يقولان:

- مش فاهمين!

- هياخد قوة معينة زي ما تقولوا أذى شيطاني بس هي إيه الله أعلم، زي خاضع امتاك قوة السحر، قصته محدش يعرفها غيري، من عشر سنين

دخل الحارة زي حسام شاب ومعاها مراته متعجب كل حاجة حواليه مينفعش ليه إنه يزني مع مراته عشان يعيش كان لازم الاتنين يعملوا معصية طبقا لقواعد الوسوسة، مراته مرضيتش، هو فضل يعمل معاصي القاعدة الأولى وهي كل يوم تنزل مرحلة لغاية ما ماتت قدامه، أصبح ضعيف!

ويخرج زفيرا ويكمل:

- لغاية ما قرر في يوم إنه مش هيبقى زيهم ونشف دماغه ووصل لمرحلة الموت على حظه كان يوم القصر الأسود اتعفى بعدها بقا خاضع الساحر.

- طب الحل إيه؟

- هنشوف الأول النهاردة هيعدي ازاي وهيحصل فيه إيه..

- قلبي مش مطمئن..

وأثناء حديثهم سمعوا صوت صياح شديد في الحارة مما يدل على بداية يوم القصر الأسود، خرجوا تاركين حسام في البيت مسرعين إلى الخارج ووجدوا أهل الحارة جميعهم واقفين عارين من ملابسهم منتظرين أمام القصر، الظلام حل على الحارة، القصر انفتحت البوابة، الجميع واقف منحني ناظر إلى الأرض وعار لا أحد يتحدث مع الآخر وأصوات متعالية من داخل القصر غير مفهومة وأصوات الجرس تترفرف بين المكان حتى ظهر صليب خشبي أمام أهل الحارة وشخص خرج من القصر يرتدي جلبابا أسودا وملامحه غير واضحة ويخرج بعده شخصان يحملان شخصا ووضعوه على الصليب الخشبي وبدأوا

في عصر دمائه وتقديمه كقربان للشيطان ويسير أهل الحارة حاملين الكأس الخشبي والرجل يضع لهم دماء بها ويشربون وأصوات الموسيقى تتعالى في القصر بالداخل الجميع يرقص ويشرب الخمر والمخدرات وهم عارين من ملابسهم منظر يشبه حفلات مصاصي الدماء يمارسون الجنس بدون تفريق بين رجل وامرأة فعلا إنهم عبدة للشيطان!

الشيطان عاش وتعشش بين البشر يدخل أجسادهم وعقولهم، تحكم في كل ما يفكرون به، سكن الفسق والمعاصي قلوبهم لكن هل كان متوقعا في يوم أن يكون للشيطان سجن يحاسب فيه البشر على أفعالهم! هذه الحارة الغريبة المريبة التي حكمها عبدة للشيطان سيطروا عليها جعلوها تخنفي وتظهر بقوة السحر، الداخل ليس بخارج، واقع غير مستحب لابد أن تعيشه لكي لا تموت!

قال الدكتور شوقي غاضبا:

- الكلام ميخشش عقلي بنكلة!

يمسك بورق قديم مصفر ويكمل:

- انتو مدركين اللي بتقولوه!؟

رد شلبي:

- واقع عشنا سنين عليه ومكناش عارفين السر غير حبة ورق مكتوب لواحدة ست دخلت الحارة والوحيدة اللي قدرت تخرج قفلت على نفسها بيتها أسبوع كامل دخلوا عليها لقوها ميتة والورق اللي بتحكي فيه اللي شافته موجود في بيتها.

رد شوقي ضاحكا:

- اשמعنا انت اللي معاك الورق؟

رد شلبي غاضبا:

- عشان الست دي تبقا مراتي

الجميع محقق متعجبا من كلمة مراتي، وقال فايزم ذهولا:

- مراتك! انت مدرك يا شلبي؟ ازاى!

- اه مراتي، كنت متجوزها، عشقتها من غير أم صادق ما تعرف، لبسها الجن، كانت بيحصلها أشياء مريبة، في يوم قالت لي ابعده ومتجيش لمدة شهر مش عايزة أشوفك وحضر عليها وكان بيكلمني خوفت جريت روحت في يوم ملقتهاش في البيت دورت عليها في كل حنة لغاية ما عرفت إنها رجعت ولقوها في البيت ميتة وبلغوني بعد ما شافوا قسيمة الجواز وادوني اللي بتحكي فيه اللي شافته في الحارة، الغريب إن جنتها اخنفت من المشرحة! ولغاية دلوقتي محدش عارف هي فين!

شوقي وفايز صمتا وانتهى الحوار.

يطرق الباب بشدة، صوت جورج يتعالى خارج البيت:

- خاضع.. خاضع!

فتح خاضع البيت وعينه شبه مغمضتين:

- في إيه؟

- حسام مش موجود!

خاضع أخذ جلبابه من الداخل وارتداه وجرى مسرعا مع جورج حتى
وصلا إلى بيت عم فتحي.

- ازاي مش موجود يا عم فتحي!

- جينا الصبح ملقيناش حسام!

- هو أكيد مماتش وجتته اختفت عشان وسوسته كانت يوم القصر!
اتعفى، فاهمني يا خاضع؟

رد خاضع متعجبا:

- فعلا كلام صح ده اللي هيجنني!

- مفيش في إيدنا حل غير إننا نستنى النهاردة هنشوف هو راح فين..

واقفة غرام أمام الأرض والدموع في عينيها تفكر:

- يا ترى انت فين يا حسام! بس إحساسي بيقولي إنك لسة عايش، انت
فين وحشتني أوي!

- انتي حبيبتيه يا غرام؟

استدارات غرام فوجدت جورج الذي تحدث فردت:

- حبيته من كل قلبي وكان نفسي أكمل معاه حياتي، الوحيد اللي كنت
ممكن أسلمه نفسي رغم مدة وجوده صغيرة في الحارة بس بجد حبيبتيه!

رد جورج ضاحكا:

- كان باين عليكى وهو فى وسوسة الموت بس تفتكرى هو فىن؟
- حسام عايش مماتش زى اللى ماتوا بس فىن مش عارفة..

رد جورج متعجبا:

- وإيه اللى مخليكى متأكدة أوى إن هو عايش؟
- لأن هو اللى هيخرجنا من الحارة، مفيش غيره، جه الوقت ناخد
حريتنا من اللى اتحكم فىنا وجعل مننا شياطين زيه!
- افرضى مرجعش وقتها هنعمل إيه أو رجع ومخرجناش!
قالت غرام غاضبة:
- قولت هيرجع ونخرج! هو وعدنى أنا شوفته قالى راجع ونخرج مع
بعض..

- خلاص اهدي هيرجع

حسام مازال مختفيا لأكثر من أربعة أيام لا أحد منهم يعلم أى خبر عنه
الجميع فى الحارة فى توهته الشيطانية يزفرون النفس لإرضاء الشيطان
وعبدته ولا يعلمون أن الله حاضر يراهم لكن خوفهم من الموت جعلهم
أكثر فسقا وفحشاء على أرض الله.

تذهب يوميا غرام ناحية الأرض وتجلس بالساعات سارحة فى حسام
تملك أمل برجوعه فى أى وقت، أحست أن هناك شىء يقف خلفها
استدارت وجدت شيزارا واقفة تضحك بوجهها القبيح المخيف وجسدها
العاري فانتفض جسد غرام وقالت بخوف:

- انتى مين؟!!

قالت شيزارا ضاحكة:

- أنا شيزارا مسمعتيش عنى قبل كدا يا حلوة؟

ردت غرام سارحة:

- اه انتي اللي ديما كان حسام بيتكلم عنك!
- أيوة أنا إيه رأيك فيا بقا بعد ما شوفتيني؟
- حسام فين تعرفي مكانه؟
- ردت شيزارا غاضبة:
- حسام حبيبك بح راح لبعيد أوي!
- ردت غرام خائفة:
- راح فين قوليلي انطقي!
- راح للحساب عشان مينشفش دماغه تاني..
- غرام اندفعت عليها حتى تفترسها اختفت شيزارا كأنها لم تكن واقفة صوتها يعلو:
- انتي فين ردي حسام راح فين يا شيزارا!
- والبكاء انتابها بقوة انهمرت دموعها الوفية على حسام ذهبت إلى بيتها عم فتحي جالس والغضب على ملامحه:
- كنتي فين يا هانم؟!
- كنت برا قاعدة..
- أنا حاسك متغيرة من يوم اختفاء حسام.. اوعي تكوني حبيتيه جدا!
- ردت غرام بغضب:
- أيوة اتزفت حبيته ارحمني حرام عليك مش من حقي أحب حد من سني؟ أنا لسة صغيرة حقي أعيش أحب واتحب ولا انت مش عندك أحاسيس زي البشر!
- رد عم فتحي غاضبا:
- انتي ازاي بتكلميني بالطريقة الوحشة دي يا بنت!
- بنت! تصدق فعلا ان أنا بنت! فوق يا بابا أنا مش البننت اللي في خيالك!

- قصدك إيه يا غرام..!

- أنا زهقت من اللي بنعمله كل يوم مع بعض مقابل إننا نعيش خوفت
أزني برا بقيت انت تزني معايا أف أنا بجد بتمنى الموت، متخيل معايا
كل يوم بتنام في حضن أبوك اللي بدل ما يحن عليك ويحسسك بالأمان
يمارس معاك الجنس قال إيه عشان مش عايز حد يمارس معايا من
رجالة الحارة، سيني ربنا يرحمنا أو ياخدنا!
عم فتحي مذهول من رد فعل غرام، جلس والصمت عليه لا يقدر على
التفوه.

الليل خيم على الحارة، جميعهم دخلوا إلى بيوتهم، صوت طرق باب
بيت خاضع يعلو حتى فتح خاضع البيت وجد حسام واقفا أمامه قائلاً:
- قالولي أعيش معاك..

رد خاضع متعجباً:

- خش ادخل وتكلم جوا..

دخل حسام إلى البيت الذي يتكون من غرفة وحيدة وبها مجموعة من
الكتب والتراب يسيطر عليها، الغرفة تشبه المدفن وسيف معلق على
الحائط وموقدة بخور في الوسط، جلس حسام ويقول:
- طلبوا مني أجيلك عشان تعملني السحر..

- قصدك على مين؟

- انت أكيد عارفهم يا خاضع.. اللي خلوك ساحر وعايزني اتبع
طريقك..

- تأخرت ليه الفترة اللي فاتت وشوفت إيه؟

حسام جسده ارتجف وقال:

- اللي شوفته مش ممكن يتوصف كأني كنت ميت دخلت قصر مظلم لا
يضيئه غير مناقد نار بسيطة مستحيل يكون بشر أشخاص مشوهة عراة

لما صحيت لقيت نفسي في غرفة كبيرة تشبه السجن كل واحد واقف في متر محبوس فيه لا أكل ولا شرب وأشخاص قاعدين بيعبدوا الشيطان بطريقة غريبة فضلت محبوس لحد ما خرجت ادوني ورقة قالولي افتحها لما تظهر في الحارة فتحتها لقيت اسمك.

- فين الورقة؟

حسام يبحث عن الورقة فلم يجدها يسير مثل المجنون حول المكان.

- عمرك ما تلاقيا.. تعرف يا حسام إن هما أضعف من إنهم يظهرها

ليا أو يخشوا عقلي.

- ليه يعني؟

- عشان أنا ممكن أذيهم نفس أذيتهم..

- بقوة السحر اللي مشهور بيها؟

- لا مين قالك إن أنا ساحر.. أنا شيخ حافظ كلام ربنا، مراتي ماتت

قصادي ومقدرتش أحميها وأنا اللي طلعت عليا سمعة إني ساحر عشان

محدث يعرف إني مش بمر بقواعد الوسوسة.

- مين اللي موت مراتك وازاي مقدرتش تحميها زي ما بتحمي نفسك؟

- شيزارا هي اللي موتتها عشان كانت عايزاني ألد، مقدرتش، سحرها

فاق قوتي كتفتني مقدرتش أعمل معاها أي شيء..

- شيزارا.. فهمت هي دلوقتي بتلعب معايا بنفس السلاح اللي لعبت بيه

معاك!

- انت دلوقتي هي عفت عنك لهدف معين يا حسام..

- طب أنا مش عارف ازاي أخرج من الحارة وازاي أحارب اللعنة

وازاي أعرف مكان البير وأنا ممكش أي سلاح أحارب بيه!

- شيزارا مش سهلة خلي بالك منها هي أكيد هتظهرلك وهتطلب منك

أفعال..

- طب أنا أعمل إيه؟
- ربك معاك متخافش
- طب انت محاولتش ليه تفك اللعنة؟
- اللعنة على الحارة محصنها بالسحر الأسود السفلي قولتلك شيزارا مش سهلة..
- خليني عندك لغاية بكرة الصبح ويحلها ألف حلال..

"هل تعلم بأن الشيطان يدخل يوميا معك في معركة ولا يحب أن يخسرها" كانت هذه المقولة يرددتها دائما الدكتور شوقي في اجتماعه الشهري بنقابة الأطباء وسط حضور المرضى الذين يعانون من الوسواس القهري.

جلس شوقي في إحدى الغرف بدوار شلبي يفكر في سر حديث شلبي ويحدث روحه: "طيب جثة مرارة اختفت راحت فين؟ وهل ليها ارتباط بحارة الوسواس؟ وهل ممكن فعلا يكون حسام وصادق دخلوا الحارة؟ بس حسام اختفي قبل صادق وبعدها اختفى برضه صادق ولغز حارة الوسواس! أنا تعبت من التفكير بس لازم الأول أعرف قصة مرات شلبي دي من بدايتها".

أسرع إلى خارج الغرفة ونزل إلى ساحة الدوار وجدهم جالسين جميعهم ومازالوا يتحدثون في اختفاء حسام وصادق. قال شوقي:

- حاج شلبي تعالى عايز أتكلم معاك شوية..
- حاضر أنا جاي يا دكتور.
- خرجا سويا إلى خارج الدوار يسيران في الحديقة الخارجية. قال شلبي:
- خير يا دكتور؟
- هما لغاية دلوقتني مالمقوش جثة مراتك؟

- ما أنا قولت في السابق اختفت..
- طب محاولتش لما ظهر عليها أعراض التشنجات تروح مثلا لشيخ؟
- روحنا كثير حتى آخر ست كان اسمها غريب مش فاكراه كدا قالت لينا عمرها ما تخف من سحرها غير لما تخش حارة الوسواس..
- ظهرت الصدمة على شوقي وقال:
- وبعدين؟
- بس دخلت الحارة وخرجت كتبت كل اللي شافته فيها على الورق المصفر اللي انت شوفته وبعدها حصلها اللي حصل..
- الورق كله مكتوب بطريقة الرموز غير آخر صفحة اللي وصفت فيها العيشة في الحارة.
- الحقيقة كل اللي عندي أنا قولته ليك يا دكتور..
- متفكرش الست اللي قالت ليها كدا موجودة فين؟
- ماتت من فترة كبيرة كنت روحت سألت عليها عشان تكون ممكن عارفة أي شيء لقيت بيتها اتحرق وهي اختفت وسط الحريق وبرضة مش لايقين جتتها.
- عايز أقولك على خبر بس مينفعش تقول لفايز، أنا شاكك إن يكون الولاد دخلوا حارة الوسواس..
- رد شلبي وهو يحدق بعينه:
- مستحيل حديثك ماسخ؛
- أنا متأكد مرض حسام أكيد دفعه للحارة لأن اسمها كمان مرتبط بمرضه..
- مستحيل، ابني لا يمكن يروح زي مرتي! لازم نتصرف يا شوقي!
- أنا في حيرة زيك احنا لازم نفك الرموز اللي في الورق ممكن تدلنا على شيء..

تقف غرام أمام الأرض البور شاردة بمخيلتها، جاء حسام من خلفها وأمسك بيديها وقال:

- على فكرة انتي وحشتيني..

غرام لم تصدق عينها وقالت:

- حسام.. حسام!

ثم اندفعت عليه واحتضنته والسعادة عليها مثل طفلة وجدت عروستها بعد فراق!

- حسام كان قلبي حاسس إنك هتيجي تاني!

- أنا جيت بس مش فاهم مموتش ليه..

- احكي لي اللي حصلك!

روى لها حسام ما حدث له داخل القصر حتى قال:

- الغريب إن بعد ما خرجت وقعدت عند خاضع وأنا مافيش حاجة

ماسكة دماغى، حاسس إنني خفيت من الوسواس كمان!

- دي حاجة تفرح وتقلق في نفس الوقت بس أعتقد انت دلوقتي لا يطبق عليك قواعد الحارة..

- بس ازاي أبقا ساحر وأصلا طلع خاضع مش ساحر!

- نسيت أقولك شيزارا ظهرتلي..

رد حسام مصدوما:

- وعملت معاكي إيه؟!

- ولا أي حاجة..

- شيزارا أكيد مش هتسيبني في حالي..

- المهم خاضع مقلش ليك ازاي تخرج من الحارة؟

- لا بس لازم أبدأ أسعى أحارب اللعنة ونخرج منها.

- مكان البير فين؟ ولو لقيته فعلا هيسقى الأرض ويخرجنا من الحارة، برضه في حاجات كثير مش واضحة!
- احنا لازم دلوقتي نقعد أنا وانتي وجورج وعم فتحي وخاضع ونشوف حل..
- طيب يلا بينا نروح البيت..

- جالسين جميعهم في المنزل عند عم فتحي حتى قال:
- يا جماعة مفيش خروج من الحارة ويا حسام انت كان حظك حلو يوم ما نزلت للموت اتعفيت كدا عيش حياتك براحتك.
- مستحيل أعيش حياتي هنا أنا أخرج يعني أخرج حتى لو كلفني الخروج موتي!
- في واحدة بس اللي قدرت تخرج من الحارة.
- قال الجميع في حالة تعجب وبصوت واحد:
- هي مين؟
- واحدة دخلت الحارة من سنين بييجي من عشر سنين مكملتش أسبوع وكانت خرجت والغريبة كمان إنها دخلت ومطبخش عليها قواعد الوسوسة.
- برضه احنا معرفناش هي مين!
- الحقيقة أنا معرفش هي مين جات ليا بليل خبطت على الباب فتحت لقيتها قالتلي خلي معاك الورقتين دول ولو حبيت تخرج من الحارة أبقا افتحها وسابنتي..
- فين الورقتين؟
- الورقتين دول بعد أسبوع من اختفائها من الحارة اختفوا..
- قال حسام غاضبا:

- انت ازاي مقدرتش تحافظ على حاجة مهمة زي دي!

- اهدا يا حسام بيقولك اختفوا!

- يعني كدا خلاص مفيش أمل نخرج من الحارة!

- نسيت أقولكم أنا فتحت الورتين قبل ما يختفوا وكانوا عبارة عن رموز وقدرت أفكها بطريقتي وتفسير الرموز دي إن لو عايز تفك اللعنة عن الحارة ابحث عن البير اللي موجود داخل القصر وهو هيفك اللعنة بمجرد وصول المياه للأرض.

قالت غرام بسعادة:

- شوفت يا حسام اللي قولتهولك صح كدا البير موجود في القصر مطلعش أو هام!

قال جورج:

- بس ازاي هتلاقي البير أنا لما دخلت القصر متقدرش تتحرك فيه مجرد دخولك بحريتك!

- ناقصة حته برضه كلام حسام صح مكانه فين بالتحديد؟

- للأسف دا كل اللي عندي وأنا لازم أمشي قبل الليل ما يليل..

- وأنا كمان سلام..

خرج الاثنان دون وضع حلول للخروج من الحارة وظل حسام وعم فتحي وغرام جالسين. وضع حسام يده على رأسه ويفكر: "أخرج ازاي من الحارة وأعرف منين مكان البير ونظرية الست دي صح ولا حتى لو لقينا البير ممكن اللعنة متنفكش والقصر أخشه ازاي كل الطرق مستحيلة مش هعرف أخرج من الحارة شكلي كدا".

- متفكرش كتير يا حسام أكيد في حل متفلقش.

- أنا تعبت نفسي أجيب حق ابن عمي وأخرج من الحارة.

- نام بس وبكرة نشوف هيصصل فيه إيه.
- تركته غرام نائما على الأرض ووضع رأسه على يديه وينظر إلى السقف حتى وجد شيزارا تقول:
- شاطر يا حسام نفذت كل اللي طلبته منك.
- شيزارا انتي فين؟
- متقلقش أنا معاك جواك زي ما قولتلك قبل كدا.
- أنا نفذت كل طلباتك زي ما عوزتي بس هترجعيلي صادق زي ما وعدتيني؟
- موت خاضع اليوم اللي هيطلع فيه صادق للحارة تاني وأخرجك من الحارة انتو الاتنين.
- حاضر هانت نفذنا نص الخطة فاضل الباقي وأسلمك خاضع وبعدها تنفذي كلامك.
- سلملي خاضع تاخذ صادق سلام يا حسام يا حبيبي.

يوم آخر من أيام حارة الوسواس، حسام جالس في دكان الخمر وحوله الرجال يتخامرون ويستهزئون بحالهم، دخل جورج عليه وهو شارد وقال:

- لسه بتفكر في موضوع الخروج من الحارة؟
- أنا ورايا غيره، لازم أخرج من المكان ده..
- هو فك اللعنة الحل الوحيد وانت متعرفش مكان البير وحتى لو عارف هتخش القصر ازاي.. ياعم عيش حياتك انت ملك هنا عايش من غير قواعد.

- اها أعيش حياتي، تصدق عجبنتي الجملة دي، أعيشها بأي طريق؟
إني أكون عبد للشيطان يتحكم فيا ولا أموت زي صادق؟
- احترت معاك أي حد مكانك يتمنى العفو في الحارة وانت لسة بتسعى في المستحيل!
- أنا هقوم محتاج أروح عند خاضع عايز أنفذ معاه فكرة جت في دماغى..
- خلي بالك من نفسك يا صاحبي خاضع مش سهل..

- حسام ترك جورج في دكان الخمر وذهب مسرعا إلى بيت خاضع
يطرق على الباب فتح له خاضع والحيرة على وجهه:
- مش انت عايز تموت شيزارا؟
- أنا عايش على اليوم ده أصلا..
- أنا اهخليك تموتها بس تنفذ اللي هقولك عليه..
- أنا محدش يشرط عليا بس هسمعك..
- أنا هسهلك دخول القصر بطريقتي وتخش لشيزارا..
- هتسهلها ازاي وانت مش عارف تخشه!
- انت عليك تخش القصر بس هتقدر على شيزارا؟
- أنا أقدر عليها لو اتقابلنا وش بوش غير كدا صعب.. دخولي للقصر هيبقى فيه مخاطرة كبيرة عليا بس أنا موافكك.
- تمام جهز نفسك ليلة القصر الأسود بكرة هنخش!
- بس مقولتليش انت هتستفاد إيه من قتل شيزارا؟
- أولا أخذ حق ابن عمي منها ثانيا لما تموت أقدر وقتها أدور على البير، ومش يمكن موتها يساوي فك اللعنة لأنها السبب فيها؟
- أنا قولتلك فك اللعنة بالبير، موت شيزارا مش هيفك اللعنة..

- بكرة وقت القصر الأسود هتلاقيني عندك عشان نخش القصر..

الساعة تدق التاسعة مساء، شلبي جالس على الأريكة بجلبابه الصعيدي يفكر بما يحدث واختفاء ولده وابن عمه: "يا ترى انت فين يا ولدي وجرالك إيه جوا المخروبة دي لو دخلت وحسام". أثناء سرحانه أحس بأن هناك شيئاً خلفه يدير جسده لكي يرى فاطمة.

- فاطمة!

والصدمة عليه زاد التعرق في نوايا جسده كثيفاً.

قالت فاطمة بصوت شيطاني:

- فضحت سري يا شلبي؟

- كان غصب عني عشان ولدي..

- ولدك مش هيرجع يا شلبي!

وبدأت يتحول وجهها إلى وجه آخر محروق مشوه والدماء تسيل منه وترفع يديها وتقول:

- ابنك مش هيرجع يا شلبي..

شلبي يصرخ خوفاً:

- الحقوني هتموتني!

خرج شوقي بعد سماع صريخ شلبي فلم يجد شيئاً وجده في حالة هيجان جسده ينتفض خوفاً راقداً على الأرض أمسكه ويقوم بإفاقته:

- اهدا يا شلبي مافيش حاجة متخافش أنا جنبك!

- عايزة تموتني أنا شوفتها! قالتلي ابنك مش راجع!

- اهدا بس عشان نقدر نتكلم هي مين؟

- فاطمة مراتي اللي ماتت..

- طب اهدا..

- ولع في الورق اللي معاك يا دكتور هتأذيني لو معملتش كدا..
- حاضر هطلعه وأولع في قدامك..
- يتحسس جيبه شوقي فلم يجد الورق سار مثل المجنون قائلا:
- الورق مش لاقيه يا شلبي كان في جيبى!
- رد شلبي:
- كيف يعني مش لاقيه دور كويس!
- أقسم بالله كان معايا ومش لاقيه شكله ضاع!
- خلاص هي أخذته منك..
- يا رب تعبت بقيت مش فاهم حاجة!
- الحمد لله على كل شيء..

يوم القصر الأسود، هذا الاسم الذي تعمق خلفه معاصي جسيمة تؤدي فعلا لوفاة الدين عند الجنس البشري، الجميع واقف يتناولون خطايا الشيطان بالفعل لا يملكون عقل، هؤلاء الشياطين الذين يشبهون البشر، يسير حسام بترقب ناحية بيت خاضع يطرق بهدوء على الباب حتى فتح وقال:

- يلا مفيش وقت هما فاضلهم دقائق ويغيبوا عن الوعي لازم نخش القصر بعدها على طول!
- أنا جاهز يا حسام وكنت مستنيك..

امسك حسام بيد خاضع ويسيران الاثنان ببطء وسط أهل الحارة الذين يفترشون الأرض عرايا، ينظر خاضع وحسام لهم والتعجب والحيرة على وجههما، رائحة كريهة تسيطر على هواء المكان يضعأ أيديهما على أنفهما ويسرعان حتى وصلا إلى مدخل القصر يسيران بخوف

فتحا الباب بعد معاناة معه دخلا وجدا رواقا كبيرا مفروشا بالدماء فوقفا
مكانهما والتردد عليهما.

- انت خايف يا خاضع؟

- عمري ما خوفت من المكان ده..

رد حسام متعجبا:

- ليه؟

- لأنني مبخافش من أي حاجة..

- احنا لازم نكمل مشي لغاية آخر الطرقة وبعدها نكسر يمين.

- يلا نمشي بس بعيد عن الدم خرينا على الأطراف..

يسيران على الأطراف بعيدا عن الدماء التي تسيطر على الأرض حتى

انتهيا من الرواق وابتعدا قليلا عن الدماء حتى وصلا إلى باب فتحه

حسام بهدوء:

- في حاجة غريبة في القصر..

- إيه هي؟

- لما دخلت كان واقف في كل حثة راجل مقنع قوي دلوقتي ما فيش حد

في القصر!

- كمل بس لغاية ما نشوف آخرته إيه..

دخلا الغرفة بعدها سمعا صوت الباب يغلق عليهما الخوف تملك منهما

رجعا خطوتين للخلف وظهرهما للحائط..

- إيه اللي حصل مين قفل علينا؟

- معرفش!

يسير خاضع ببطء ناحية الباب لكي يفتحه لكن لم يستجب يطرقه بشدة

لكن لا أحد يرد على طرقة!

- متحاولش، شكلنا اتحبسنا..

- ازاى! حد يفتح! حسام ابعده عني اقف هناك للآخر..
بعد حسام وقف في نهاية الغرفة بدأ خاضع وهو واضع يده على صدره
يتمتم بكلام في سره ثم قال:
- افتح بقوتي.

انزع الباب من مكانه وطار بعيدا فظهر الذهول على حسام والصمت
على ملامحه.

- قولتلك أنا مبخافش.. هنعمل إيه تاني؟

- مش عارف القصر كله مكنش فيه غير الباب ده..

- طب تعالى معايا أكيد في مكان تاني..

يسيران ناحية الجانب الشمالي في آخر الرواق الحيرة على حسام
والخوف يسيطر على ملامحه خاضع ينظر يمينه ويساره بحذر حتى
وقف فجأة والصمت عليه اتجه ناحية حائط مغطى بساتر كبير لونه
أسود فأمسك الساتر وقطعه من الحبال ليجد بابا أمامه فقال حسام:

- انت عرفت منين إن في حاجة هنا؟!

- متسألش وامشي يا حسام..

فتح خاضع الباب بعد أن أخرج مفتاحا من جيبه.. حسام ينظر للمفتاح
والحيرة عليه، بدأ يصعدان على السلالم بخوف أمسك يد حسام خاضع
ويسير ناحية قصر الداخلي لشيزارا فقال حسام مصدوما:

- انت عرفت المكان ده منين كأنك كنت عايش فيه!

- اصبر يا حسام..

دخلا المكان وجدا رجالا نائمين على الأرض غائبين عن الوعي
وأمامهم صليب خشبي عليه بعض أجساد مشوهة والدماء تسيل منها
ورائحة كريهة والخوف على حسام.
- ده مكان القصر الأسود والدم ده اللي بيشر بوه يومها والناس دي اللي
بتختفي عند وسوسة الموت..

قال حسام غاضبا:

- انت عرفت ده منين؟

الصمت على خاضع لم يرد.

حسام يزداد عليه الغضب ويقول:

- فهمني!

حتى سمع صوتا

- عشان هو في يوم كان في القصر..

- كنت مستنيكي..

- دخلت القصر بس بمزاجي بتساهيلي، ولا إيه يا حسام؟

- أنا مش فاهم حاجة ممكن تفهموني!

- أنا أفهمك دي شيزارا هي ولا قتلت مراتي ولا حاجة هي تطردني من

المكان دا بقوة سحرها عشان كنت عايز أسيطر عليه في يوم لأنني كنت

ساحر من ضمن خدامها وجه الوقت إنني أموتها عشان أسيطر على

حارة الوسواس..

- وانت عندك اقتناع بإنك تقتلني وتهسيطر على الحارة؟

- شيزارا أنا مليش دعوة بحواراتكم أنا عايز صادق!

ردت شيزارا ضاحكة:

- فاكرا يا حسام لما قولتلك متأمنش لواحدة ست؟ صادق مات خلاص

واتشرب دمه.

- يعني انتي ضحكتي عليا!
 - اه ضحكت عليك خايتك تجيب خاضع لغاية عندي عشان أقتله وأقتلك
 بعديها.
- شوفت صدقتني لما قولتلك وعدھا زايف؟ بس عايز اقولك على سر،
 أنا وحسام اتفقنا عليكي أصلا من البداية عشان أنا اللي عايز أشوفك
 عشان انتي عارفة هيجصلك إيه..
 ردت شيزارا ضاحكة:
- ما أنا عارفة عشان كدا سيبتكم تخشولي قصري..
 وأضاف بغضب:
- يا خادم.. يا خادم!
 دخل مجموعة من الرجال المقنعين أقوياء البنية وقالت:
- امسوكهم!
 - استنوا بس عايز أقولھا حاجة!
 أدخل يده إلى جيبيه وأخرج قطعة من القماش ملفوفة على هيئة مثلث
 وقام برميھا على شيزارا التي أمسكتھا بعدها وضع يده على صدره
 ويتمتم في سره حتى صرخ بصوت عال تحول لصياح قوي في المكان
 الجميع يضع يديه على أذنيه شيزارا الخوف عليها تختبئ بالحائط
 الرجال يفرون هاربين حسام راقد على الأرض يمسك أذنيه.
 صرخت شيزارا بصوت عال:
- كفاية يا خاضع خلاص!
 هدأ خاضع من صياحه قائلاً:
- المرة دي مش هسيبك يا شيزارا سحرك مش هيرحمك من موتك!
 - انت عايز إيه يا خاضع!؟
 - أموتك أو أطردك وأسيطر على حارة الوسواس.

شيزارا غير قادرة على الحركة فعلت العديد من المحاولات لكي تتحول
بسحرها لكنها لم تقدر تأخذ نفسها بصعوبة.
- مش هتقدري متحوليش أنا اتحكمت في القصر كله وجميع الأشخاص
اللي فيه من سحره أصبحوا تحت سيطرتي.
- خرجني من القصر يا خاضع متموتنيش!
- أخرجك للحارة وتعيشي على قواعدها ومتعلميش في يوم إنك ترجعي
تاني تسيطر عليها عشان أصبحت حارتي يا شيزارا!
حسام بدأ يفتح عينيه وبصوت منخفض قال:
- أنا عايز صادق يا شيزارا!
- صادق مات متسألنيش عليه تاني!
رد حسام بغضب:
- هموتك يا شيزارا!
- خلاص يا حسام اللي بينزل لوسوسة الموت في الحارة مش بيرجع..
قال خاضع:
- قدامك دقيقتين وتخرجي برا يا شيزارا!
خرجت شيزارا من الغرفة مسرعة للخارج بعد أن رجعت إلى طبيعتها
و غاب عنها سحرها..
- حسام طلباتك إيه؟
- أنا عايز أعرف مكان البير عشان أفك اللعنة عن الحارة..
- مافيش بير يا حسام أنا قولتلك كدا عشان أحمسك تخش القصر
وميقاش ليك طريق غير إنك تدخل القصر وتسلمني لشيزارا اللي هي
بغرورها فاكرة إنها هتموتني.
- يعني إيه! أنا مش هعيش في الحارة!

- أنا هخرجك من الحارة بس بشرط إنك متحكيش اللي شوفته أو طريقة العيشة في الحارة وإلا هموتك!
- خرجني بس خرج معايا غرام..
- انت بس اللي هتخرج من الحارة مقدرش أخرج حد ثاني لأنك السبب إنني أسيطر على الحارة..
- بس أنا مقدرش أسيب غرام!
- اخرج وأنا أبقا أخرجها بعدك تعالى نام هنا.
- نام حسام على الأرض ووضع خاضع يده على صدره ويتمتم في سره حتى غاب عن الوعي.

"قبل النطق بالحكم بيوم"

يدخل عسكري ويخرج حسام من السجن. قال العسكري:

- قوم يا متهم عشان تقابل المحامي بتاعك.

يظهر إبراهيم محامي حسام و يجلسان مع بعضهما.

- حسام النهاردة اليوم الأخير وبكرة الجلسة النهائية لازم تحكيلي كل حاجة حصلت وليه ارتكبت الجرائم دي كلها لازم تتكلم!

- أنا أقولك يا أستاذ إبراهيم أولا أبويا فايز السبب الرئيسي إنني أبقا كدا لانه لو مكنش قتل زمان مكنش حصلي كل ده!

- هو قتل مين فهمني؟

- قتل وهو شاب في الصعيد ولد صغير ابن ست غلبانة وهرب لمصر
واتجوز وخلفني وكنا بنروح البلد متخفين زي الحرامية هو السبب
بعدها خلفني حصل اللي حصل جالي وسواس قهري دخلت في حالة
اكتئاب تخيل عندي ١٥ سنة وعندي اكتئاب كبرت في عزلة تامة
حاولت أنتحر بس خوفت من ربنا..

- بس دا إيه اللي دخله في قضيتنا الرئيسية!

رد حسام غاضبا:

- هو دا الأساس لو مكنش عمل كدا مكنتش بنت الست دي وصلتني اللي
أنا فيه انت فاهمني!؟

- أنا ولا فاهم حاجة! بنت ست مين وأبوك مين يا حسام انت مرتكب
أربع جرائم في جريمة واحدة متخيل الماساة اللي انت فيها؟

- لا أنا عملت غصب عني هو اللي كان بيوسوس ليا أيوة كان بيقولي
أشرب خمرة ومخدرات اسرق واقتل محدش هيجاسبك

- فوق يابني انت لسة واهم نفسك بحارة الوسواس محدش هيصدق إن
في حاجة كدا أصلا بكرة هيتحكم عليك بالإعدام وهموت!

رد حسام مرتعشا:

- لا خلاص أنا موتها وخاضع موتها هي السبب في كل اللي حصلي أنا
أكيد بحلم وهفوق وهصحى في دنيا تانية كل حاجة تمام فيها..

- حسام ليه قتلت غرام وانت عارف إنك بتحبها لازم تحكي الحقيقة
عشان أقدر أساعدك بكرة قدام القاضي..

رد حسام وهو بيكي:

- ضحكت عليا قالت إنها بتحبني أثارها اتفقت عليا هي وجورج عشان
يلعبوا بيا وبمرضي جابتي عندها البيت على أساس نقعد مع بعض
نسهر زي كل يوم قعدوا يشربوا الاتنين خمرة ومخدرات سكروا
ولسانهم فضحهم وقالوا كل حاجة كانوا عايزين يعملوها بسخرية
واستفزاز مصدقتش قومت مسكت السكينة قتلت جورج غرام حاولت
تهرب مسكتها اغتصبته وموتها وسرقت الفلوس بتاعتهم وجريت في
الشارع زي المجنون لغاية ما روحت لابن عمي صادق والدم عليا
حكيتله قعد يأنب فيا وقال لي سلم نفسك فجأة جريت قعد يجري ورايا
خايف عليا ركبت عربيته ركب جنبي بسوق اتقلبنا ومات صادق
ومكش ليه ذنب وبردة أنا السبب أمي اللي بردة ماتت من حسرتها عليا
كان نفسي أقولها إني بحبها أوي كان نفسي أكون حد كويس بس غصب
عني كان لازم أنفذ أوامره أنا مريض بالوسواس بيتهيا ليا حاجات مش
موجودة بس المرض ميعملش كدا، جوايا روح تانية بتتحكم فيا أوهمتني
إن عندي وسواس قهري وهو في الأساس قريني السيئ المغضوب
عليه، أنا مش خايف من الموت أنا عارف إني هتعدم.

- نتقابل بكرة في الجلسة يا حسام..

- أنا قولتك الحقيقة مكذبتش عليك!

- بس في حاجة قولتها غلط يا حسام..

- لا قولت كل حاجة ودا اللي حصل!

- أمك مماتش زي ما قولت أمك عايشة..

- لا ماتت أبويا قالي كدا!

- للأسف يا حسام أبوك أصلا ميت!

يدخل عليهما الدكتور شوقي والغضب عليه ويقول:

- حسام انت لازم تفوق من أوهامك دي المرض تحكم في خلايا مخك
خلاص أبوك وأمك ميتين دا اللي لازم تعرفه وكل اللي بتحكيه أوهام
وتخاريف مفيش حاجة اسمها حارة الوسواس انت في نظر المجتمع
مجرم ومحدث هيرحمك!

- دكتور شوقي قوله والنبي، أنا أبويا وأمي عايشين صح؟

رد شوقي باكيا:

- لا يا حسام ميتين وأنا اللي رببتك بعد موتهم وحارة الوسواس وهم،
فوق هتتعدم!

قال إبراهيم لشوقي:

- مفيش أمل خلاص أنا بكرة هعمل اللي عليا وربك يسترها..

حسام ينظر إليهم ويحرك أعضاء جسده بطريقة مريبة! بالفعل مريض
بالوسواس القهري!

همس له الوسواس:

- الحارة موجودة يا حسام متصدقش كلامهم..
- أها موجودة وخاضع قالي أخرجلك غرام بس مخرجتش ليه؟
- هتخرج لأنها جزء من حارة الوسواس.

المشهد الأخير "المرافعة"

يقف حسام داخل القفص ويجلس القاضي ويقف أمامه إبراهيم حيث يترافع عن حسام الذي يرتدي ملابس السجن داخل القفص ويفعل حركات مريض الوسواس. نادى إبراهيم:

- سيدي الرئيس، حضرات المستشارين، قبل أن أخوض في غمار الدفاع وأفند أوصال الاتهام أحيل إلى عدالتكم وقائع القضية وأهمها هو انتفاء القصد الجنائي من قبل المتهم، حيث إن المتهم يعاني من مرض نفسي حاد يسيطر عليه ويدفعه إلى ما نحن عليه الآن، فالمتهم لم يكن يقصد ارتكاب كل تلك الجرائم بغرض الانتقام ولكنه كان يحاول إسكات الأصوات التي تثير غضبه من حوله والتي كانت أقوى من نزعه الإنسانية والفطرية، فكل جريمة كانت ترتكب سيادة الرئيس كان المتهم أمامها قليل الحيلة لا يقوى علي التحكم في مشاعره لكثرة الوسواس في رأسه والتي تثير غضبه وتدفعه إلى مخالفة الفطرة التي خلقها الله بها فمرضه كان أقوى منه، وإني يا سيادة الرئيس لا أحاول بتلك الكلمات أن أchied عن الحق ولكني أريد من عدالتكم البحث عن الحقيقة والتي دفعت المتهم إلى ارتكاب كل تلك الجرائم بعقل غير واع، بعقل مسير لا مخير، فإني يا سيادة الرئيس أطلب من عدالتكم تحويل المتهم لإجراء الكشف الطبي عليه لبيان مدى سلامة عقله للوقوف علي حقيقة تلك الواقعة، ولذلك أحب أن أوضح أكثر لسيداتكم بعد سنوات من جلد الذات تدرك أنك لست شيطاناً كما كنت تعتقد أو يراد لك أن تعتقد.. وأنك لم تكن سوى إنسان طبيعي ارتكب بعض الأخطاء.. وأن ذلك الالتزام

الأخلاقي الكامل الذي تم الترويج له كشيء قابل للتطبيق بل وسهل الوصول.. ليس سوى مجرد وهم.. وأن المطلوب كان فقط أن تكون لديك نية صادقة بعدم إيذاء الآخرين.. وأن تبذل ما في وسعك من أجل ذلك..

يأخذ شهيقا ويكمل:

- سيدي القاضي إن ما أطلبه من سيادتكم ليس العفو الكامل على موكلي بل العفو الرحماني من حضرتكم، إن موكلي إنسان مثل أي إنسان يعيش معنا على هذه الأرض تملكه الغرائز العفوية للدفاع عن روحه من المتوحشين الذين يتزايدون يوما بعد يوما، عاش موكلي موسوس له وخاضع لأحكامه حتى دفعه إلى ارتكاب جرائمه الشنيعة، يا حضرة القاضي، هذا الشخص المدعو أمامكم في القفص واقف صامت، إنه غير مدرك بنا الآن بل ينتظر أوامر وسوسته حتى يطلق أحاسيسه. أنا أطالب وبكل قوة بعدم تطبيق عقوبة الإعدام على حسام لأنه ليس من حقنا أن نعدمه من أجل أشياء لا تستحق تلك العقوبة فقبل أن نعدمه يجب محاسبة ما جعله بهذه الطريقة أولا، يجب محاسبة الذي تركه مريضا وخضع لأقاويل السحرة والمشعوذين بأنه ملبوس وفعل به ما لا يخطر على بال أحد منذ الصغر، ثانيا يجب محاسبة غرام لأنها التي جعلته مريبا بسبب إخضاعها له وادعت بأنها تحبه حتى تسخر من مرضه الذي لا ذنب له فيه هي وصديقتها جورج الذي لا أقول عنه سوى اذكروا محاسن أمواتكم، رابعا قبل أن تنطق بالإعدام يا سيدي القاضي أوجه لك سؤالا، لو كان الإعدام حلا لابتعاد الإنسان عن جرائمه لكان من أول شخص أعدم في العالم لا يعدم أحد بعده خوفا من الموت، الإعدام ليس حلا، الحل الحقيقي في أن يعدم الشيطان الذي خلق من وسوسته مرضا دفع

الآلاف من البشرية إلى الموت والقتل والفسق والفجور، لا مفر من
وسوسته سيدي القاضي، انت الآن جالس بيننا وهو يبعث في رأسك،
فماذا ستفعل مع حسام لو نطقت بالإعدام؟ ستسأل نفسك مرة هل
هذا الشاب مظلوم أم مريض. انتهت مرافعتي يا سيدي القاضي.

قال القاضي:

- رفعت الجلسة -

" النهاية "



جميع حقوق النشر محفوظة. ولا يحق لأي شخص
أو مؤسسه أو جهة إعادة إصدار هذا الكتاب. أو جزء منه .
أو نقله بأي شكل من الأشكال أو تدواله الكترونيا نسخا
أو تخزينا دون إذن خطي من الدار